


蜀中方物記卷之一

鳥

嚴君平道德指歸云羽者翔虛而神鳳王之揚子雲
草玄夢吐白鳳于玄上盖鳳有文章而神明者不易
見之物也予讀山海經曰都廣之野鸞鳥歌焉則鳳
在蜀中已見之矣北周書武帝天和之年渠州上言
鳳皇集于楓樹羣鳥列侍者以萬數又唐書天復七
年六月鳳皇見萬歲縣即今之開縣也水經註云越
雋郡之廢葉榆縣有鳥弔山山上有鳥千百羣飛其



畏天畏人
心法積善
積德名家

閩中曹學佺能始者



會時嗚呼啁晰歲必一度大集云鳳凰死於此
雲笈七籤云雲頂山鐵像天尊是則天朝濛陽匠人
廖元立所鑄初鑄時有紫雲如城其上吐五色以捧
日衆共瞻禮間忽有靈鶴數隻引一大鳥翼廣丈餘
通身赤色其形如鳳衆鶴繞鑪盤旋嘹唳相應大鳥
飛勢迅疾徑入鑪中忽起火焰高三五十丈其聲如
雷邈迤屬天迸散流溢直遍山上衆皆奔駭已聞異
香之氣彌日方散

朝野僉載劍南彭蜀間有鳥大如指五色畢具有冠
似鳳食桐花每桐結花卽來花落卽去不知何之俗
謂之桐花鳳極馴善止於婦人釵上客終席不飛人
愛之無所害也寰宇記云桐花色白至春有小鳥色
蕉紅翠碧相間生花中惟飲其汁不食他物花落遂
死人以蜜水飲之或得三四日性多跳擲抵觸便死
土人畫桐花鳳扇卽此也按桐花鳳扇唐李衛公有
賦矣瑯嬛記云桐花鳳小于玄鳥春暮來集桐花一
名收香倒掛又名探花使性馴好集美人釵上出成
都疑卽東坡詞所謂綠毛幺鳳名倒掛耶唐僧隱巒
詩五色毛成比鳳雛深藏花裏只如無美人買得偏
憐惜移向金釵重幾銖劉言史題蜀客楊生亭云垂

絲蜀客涕沾衣歲盡長沙未得歸腸斷錦城風日好
可憐桐鳥出花飛李之儀阮郎歸詞詠倒掛云朱唇
玉羽下蓬萊佳時近早梅探花情味久安排枝頭開
未開魂欲斷恨難裁香心休見猜果知何遜是仙才
何妨入夢來宋祁贊云金花之露俗曰鳳類綠羽織
爪藻背翠尾花落則隱以是見貴

益州方物略云紅桐嘴出永康軍山谷中絳體若赭
惟羽間差黑人亦蓄之然不能久也贊曰絳質剛喙
孱黑于矜因網就羈亦馴厥心

又云護花鳥青城峨眉間往往有之至春則啼其音
若云無偷花果髣髴人言贊曰苦首黑裳黃駁其羽
厥鳴嚶嚶若禁若護名而不情盜者猶懼

又云百舌鳥出蜀山谷間毛采翠碧蜀人多蓄之一
名翠碧鳥善效他禽語凡數十種非東方所謂反舌
無聲者往往亦矜鬪至死不解然捕者告罕故惜之
不使極其擊云贊曰綠衣紺尾一啼百轉可樊而蓄
為世嘉玩

拾遺記曰吳黃龍元年越雋之南獻背明鳥止不向
明巢常對北多肉少毛聲音百變聞鐘磬笙竽之聲
則奮翅搖頭時人以為吉瑞及遷都建業吳人語訛

呼背明為背亡鳥國中以為大妖不及百年當有喪
亂滅亡之事果如斯言

爾雅鴛周燕子鴛鳥出蜀中說文云蜀王望帝化為
子鴛今謂之子規也師曠禽經云江左曰子規蜀右
曰杜宇甌越曰怨鳥又云杜鵑出蜀中狀如雀鷄而
色慘黑赤口有小冠春暮即鳴夜啼達旦鳴必向北
至夏尤甚晝夜不止其聲哀切田家候之以興農事
惟食蟲蠹不能為巢居他巢生子冬月則藏蟄矣揚
雄蜀記曰望帝杜宇者蓋天精也稱王時荊州有人
化從井中出名曰鼈靈於楚身死屍反泝流上至汶

山之陽忽復生乃見望帝立以為相其後巫山龍闕
壅江不流蜀民墊溺鼈靈乃鑿巫山開三峽降丘宅
土民得陸居蜀人住江南羗住城北始立木柵周三
十里令鼈靈為刺史號曰西州後數歲望帝以其功
高遂禪位焉號開明氏望帝脩道處西山而隱化為
杜鵑鳥或云化為杜宇鳥亦曰子規鳥至春則啼聞
者悽惻焉酉陽雜俎以杜鵑知陽相推而鳴先鳴者
吐血死初鳴時先聽者主離別瑯嬛記昔有人飲于
錦城謝氏其女窺而悅之客聞子規啼心動即謝去
女恨甚後聞子規啼則怔忡若豹鳴也使侍女以竹

枝驅之曰豹汝尚敢至此啼乎故名子規為謝豹亦
主離別也宋鮑照擬行路難詩愁思忽而至跨馬出
北門舉頭四顧望但見松栢園荆棘鬱頭躄中有一
鳥名杜鵑言是古時蜀帝魂聲音哀苦鳴不息羽毛
憔悴似人髡飛走樹間啄蟲蟻豈憶往日天子尊念
此死生變化非常理中心惻愴不能言杜甫詩君不
見昔日蜀天子化為杜鵑似老鳥寄巢生子不自啄
群鳥至今為哺雛雖同君臣有舊禮骨肉滿眼身韜
孤業工竄伏深樹裏四月五月偏號呼其聲哀痛口
流血所訴何事常區區爾豈摧殘始發憤羞帶羽翮

傷形愚蒼天變化誰料得萬事反覆何所無萬言反
覆何所無豈憶當殿群臣趨温庭筠詩蜀魄千年尚
怨誰聲聲啼血向花枝滿山明月東風夜正是愁人
不寐時羅隱詩銅梁路遠草青青此恨那堪枕上聽
一種有冤猶可報不如銜石疊滄溟陸龜蒙詩碧竿
微露月玲瓏謝豹傷心獨叫風高處已應聞滴血山
榴一夜幾枝紅又蜀客春城聞蜀鳥思歸聲引未歸
心那知夜夜愁相似爾正啼時我正吟胡曾詩杜宇
曾為蜀帝王化禽飛去舊城荒年年來叫桃花月似
向春風訴國亡

鷓鴣蜀夔州郡皆有之宋市衣陸士規入蜀詩云東風吹草綠萋萋路入黃陵古廟西帝子不知春又去亂山無主鷓鴣啼

揚雄賦有鷓鴣註云伯勞也蜀童謠有陽雀叫鷓鴣笑之語一名鷓音鴣蜀中名鴛鴦滇中名醜油郎好掠人冠巾衆鳥畏之俗又名鳳皇阜隸性好獨易縞鷓必單栖樂府東飛伯勞皆一物曹植惡鳥論云昔尹吉甫用後妻譖殺其子伯奇後悟悲傷出遊于田有鳥鳴于桑聲殷然吉甫動心曰伯勞乎是吾子棲吾輿伯勞尋聲而棲下蓋占甫乃射殺後妻以謝之故俗惡伯勞鳴言所鳴之家必有尸也

錄異記王蜀刑部侍郎李仁表將入貢春官時薛能尚書為鎮先繕所業詩五十篇以為贄濡翰成軸於小亭凭几閱之未三五首有戴勝自簷飛入立於案几之上馴狎良久仰頸蹶翼而舞向人若將語久之又轉又舞如是者三超然飛去翌日投詩薛大加禮待以其子妻之

爾雅曰鷄大者蜀蜀子鷄郭璞注曰蜀今蜀鷄也鷄鷄子名廣雅云辟雉鷄也杜艾季蜀皆鷄名禽經云吐綬鷄出巴峽山中人名蓄玩大如家鷄小

者如鳩鵲頭頰似雉羽色多黑雜以黃白圓點如真珠斑項有喙囊內藏肉綬常時不見每春夏晴明則向日擺之頂上先出兩翠角二寸許乃徐舒其領下之綬長闊近尺紅碧相間采色煥爛踰時悉斂不見或剖而視之一無所覩此鳥生亦反哺行則避草木亦謂之避株鳥按食物本草謂之吐錦鷄古今注謂之錦囊蔡氏詩話謂之真珠鷄倦游錄謂之孝鳥詩經謂之鷓鴣旨巴邛有旨鷓是矣

墨莊漫錄云中官陳彥和言宣和中掌禽苑見蜀中貞一鳥狀如鷺色紺翠尾甚多而長飛則尾開裊裊

如雙旗其名曰王母老杜玄都壇歌王母畫下雲旗翻卽此

山海經曰岷山其鳥多鷓鷥郭註云鷓白鷺赤汲冢王會云巴人以比翼鳥蜀人以文鷓文鷓者若臯鷄注尔雅云鷓天鷄赤羽也文若翬雉一名鷓風周成王時蜀人獻之

蜀都賦蝓螭山栖註鳥名也如今之所謂山鷄其雄色斑雌色黑出巴東郡按華陽國志孟獲激其屬反曰官欲蝓腦三斗卽此物也

西京雜記成帝時越雉獻長鳴鷄伺鷄晨卽下漏驗

之晷刻無差每鳴則一食頃不絕長距善聞

蜀都賦碧鷄儵忽而曜儀地理志曰碧鷄在越雋青
蛉縣禺同山漢宣帝時方士言益州有碧鷄神可以
醮祭而致也使諫議大夫王褒持節往求之褒道病
竟不能致成都有碧鷄坊蓋祠所也老杜詩時出碧
鷄坊其後西川校書薛濤嘗宅于碧鷄坊老焉

漢書元始元年正月王莽白太后下詔以白雉薦宗
廟益州風益州令塞外蠻夷所獻也

火祥志云蜀建興九年十月江陽至江州有鳥從江
南飛渡江北不能達墮水死者以千數是時諸葛亮

連年動衆志吞中夏而終死渭南所圖不遂又諸將
分爭頗喪徒旅鳥北飛不能達墮水死者皆有其象
也蜀李雄書曰武皇帝雄泰成三年白鳥赤足來翔
帝以問范賢賢曰鳥有及哺之意必有遠人懷惠而
來果關中流民請降宋書孝武大明五年六月赤鳥
見蜀郡益州刺史劉思考以獻周書武帝保定天和
等年益州獻三足鳥者凡數次按相如大人賦以三
足鳥為之使矣

山海經峒山江水出焉有鳥狀如鷄而赤身白首其
名曰竊脂可以禦火郭璞注云今呼小青雀曲嘴而

肉食者為竊脂疑非按本草云蜀徼有火鴉能啣火
是也人家多避之山海經乃謂其可以禦火是必以
焚灼之具而作威福于人者

黔中有山胡鳥善鳴一作山呼東坡過涪州得山胡
詩云終日鎖筠籠回頭惜翠茸誰知聲噓噓亦自意
重重夜宿烟生浦朝鳴日上峰故巢何足戀鷹隼豈
能容

蜀都賦彈言鳥於森木註言鳥鸚鵡也南方異物志
曰鸚鵡有三種青大如鳥曰者白大如鴟鴞者五色
大於青雀者交州巴南盡有之凡鳥四指三向前一

向後此獨兩指向後性好食芝麻劉艾漢獻帝傳興
平元年詔曰往者益州獻鸚鵡三枚夜食三升麻子
今穀價騰貴此鳥無益有損可付安西將軍楊定令
歸本土是矣予武擔署園中有松樹數株每花熟時
此鳥羣過而掠之颯颯有聲綠雲蔽天登時花為之
盡采摘稍遲惟有悵惜

唐節度使常公臯常蓄一鸚鵡其夫人河東裴氏教
以念佛他日奄化用闍維法葬之有舍利十餘粒乃
作塔記云元精以五氣授萬類雖鱗介羽毛必有感
清英純粹者矣或炳耀離火或稟竒蒼精皆應乎人

文以奉若時政則有革彼禽類習乎能言了空相於不念留真骨於已斃殆非元聖示現感於人心同夫異緣用一真化前歲有獻鸚鵡者曰此鳥聲容可觀音中華夏有河東裴氏者志樂金僊之道聞西方有珍禽羣嬉和鳴演暢法音以此鳥名載梵經智殊常類意佛身所化常狎而敬之始告以六齋之禁比及辰後非時之食終夕不視固可以矯激流俗端嚴梵倫或教以持佛名號者曰當由有念以至無念則仰首奮翼若承若聽其後或俾之念佛則默而不荅或謂之不念卽唱言阿彌陀歷試如一會無爽異余謂

其以有念為緣生以無念為實際緣生不荅以為緣起也實際雖言定本空也每虛室戒曙發和雅音穆如笙竽靜鼓天風下上成文念念相續聞之者莫不洗然而嘉善矣於戲生有辰乎緣有盡乎以今年七月悴爾不懌已日而甚馴養者知其將盡乃鳴磬告曰將西歸乎為爾擊磬爾其存念每一擊磬一稱彌陀佛洎十擊磬而十念成歛翼委足不震不仆奄然而絕按釋典十念成往生西方又云得佛慧者歿有舍利知其說者固不隔於殊類哉遂命火以闍維之法焚之餘燼之末果有舍利十餘粒炯爾耀日瑩然

在掌識者驚視聞者駭聽咸曰苟可以誘迷利世安
往而非菩薩之化歟時有高僧慧觀常詣三學山巡
禮聖迹聞說此鳥涕淚悲泣請以舍利於靈山用陶
甃建塔旌異也余謂此禽存而由道歿有明徵古之
所以通聖賢階至化者女媧蛇軀以嗣帝中衍鳥身
而建侯紀乎策書其誰曰語恠而况此鳥有弘於道
流聖證昭昭胡可默已是用不愧直書于詞貞元十
九年八月十四日記

常又蓄一孔雀鑿池以居之武公元衡來繼任此鳥
猶在使宅因作詩傷之一時屬和皆名士焉韓愈詩

云穆穆鸞鳳友何年來止茲飄零失故態隔絕抱長
思翠角高獨聳金華煥相差生蒙恩顧重畢命守塔
堦白居易詩云索莫少顏色池邊無主禽難收帶泥
翅易結著人心頂毳落殘碧尾花銷闌金放歸飛不
得雲海故巢深王建詩云孤號秋閣陰常令在時禽
覓伴海山黑思鄉橘柚深岑頭聞舊曲願尾惜殘金
顛悴不飛去重君池上心建又有傷常令孔雀詞可
憐孔雀初得時美人為尔別開池池邊鳳皇作伴侶
羞聲鸚鵡無言語雕籠玉架嫌不栖夜夜思歸向南
舞如今憔悴人見惡萬里更求新孔雀熱眠雨水饑

蜀中名物 卷之一
拾蠹翠尾蟠泥金彩落多時人養不解飛海山風黑
何處歸

武相國在蜀又有春曉聞鶯詩韓愈和云早晚飛來
入錦城誰人教解百般鳴春風紅樹驚眠處似妬歌
童作艷聲王建和云侵黑行飛一兩聲春寒轉小未
分明若教更解諸餘語應向宮花不惜情予按成都
文類武公元衡中秋登錦城樓詩席客和者至十許
人皆知名士公亦節鎮之有文而好事者與

盛弘之荊州記曰雁塞北接梁州汶陽郡其間東西
嶺屬天無際雲飛風蕪望崖迴翼惟一處為下朔雁
達塞矯翮裁度故名雁塞同於雁門也梁州記曰梁
州縣界有雁塞山傳云此山有大池水雁栖集之故
因名曰雁塞成公綏雁賦云奔巫山之陽隅兮趨彭
澤之遐裔矣

方物略云荏雀每歲荏熟則羣至食其實性好闖人
捕之裒錢使決勝負閭里曹觀至一雀直數千錢官
司惡民贅聚每下符禁叱之贅曰緇綠廁彩喜荏克
膾奮頸鬚顛矜健于味里人裒貲以佐其闖按荏菽
今之胡豆也

傅玄蜀都賦曰鷹則流星耀景奔電飛光青骹素羽

飄雪繁霜范鎮東竺記事云嘉陵江上見二鶻擲卵相上下以接之蓋習其飛也其胎教之意乎又翅羽未成躍出穴巢往往墜岸下死其天性峻勇是亦躁進之類也予今歲在錦城立秋後一二日親見此種物盤空搶地作得意狀蓋非搏擊則不能躁進勢相因矣

山海經云梁渠之山有鳥焉名曰囂其音如鵲食之止衙郭注治洞下也

盛弘之荊州記曰巫縣有鳥如鷓鴣其名爲鴉楚人謂之鵬青城外史云梟鳥不見泰山夜則察秋毫

此往志新載也灌縣最多梟形如楚梟而小遇五更則鳴人鮮忌之然晝則日明夜則反暗此可以補記載之遺按梟鳥不宜晝明而晝明者以時尚伺察白晝公行故耳何足異云

蜀都賦風胎若鴟註風胎鳥名未詳按莊子曰鴟相視眸子不運而風化卽此物也

蜀人呼鶴鴿爲連點七五代時有問洪杲禪師曰如何是連點七師云屈指數不及地上無蹤迹

廣志曰野鴨雄者赤頭有距鶩生百卵一日再生有露華鶩以秋冬生卵竝出蜀杜甫花鴨詩云花鴨無

泥滓堦前每緩行羽毛知獨立黑白大分明不覺羣
心妬休牽衆眼驚稻梁露汝在作意莫先鳴甫又有
鷓鴣詩云故使籠寬織須知動損毛看雲莫悵望失
水任呼號六翮曾經翦孤飛卒未高且無鷹隼慮留
滯莫辭勞盖多自况之意也

獸

李膺益州記云張道陵登仙之所常有麒麟白鶴遊
翔其上武陽志云漢朱褒獲麒麟於馬頰嶺故界有
麒麟橋也唐書元和七年冬東川觀察使潘孟陽奏
龍州平武縣嘉禾生有麟食之麟之來羣鹿環之光

彩不可正視使畫工圖獻焉張仲素表賀曰伏見劔
南東川觀察使潘孟陽奏龍州寶華山中有麟見獨
角馬蹄遍身光耀并嘉禾二十二莖至八十九穗麟
見與鹿每來同食各畫圖函盛封進者臣聞六合同
歸則麒麟至天下和一則嘉禾生伏惟陛下昭事上
帝凝情衢室宵興滌慮申旦忘倦大敷至化以永時
邕故得希世之祥應我皇運異質卓犖竒彩光明顧
步幽巖發聞郡國神物自生於聖日靈編徒載其嘉
名况大田之中衆穗斯茂沐以膏澤翕其祥風而後
呈彼珍羣承茲共觝必生長畝之秀以期王者之瑞

因緣所驗鄭重合符有以識上聖之心兆至和之本
德超千古慶洽無疆日月所均無思不服臣等幸親
休異喜萬恒情無任抃躍之至按蜀檮杌王建武成
年麒麟屢見則皆偽物不足書也

漢神爵中方士言益州有金馬神詔資中王褒往祠
之蜀都賦所謂金馬騁光而絕景也今成都治內有
金馬坊坊側有祠宋賜額名昭應云華陽國志曰會
無縣有天馬河天馬日行千里死於蜀葬江原小亭
今天馬塚是也縣有天馬祠民家馬牧於山下或產
駿駒云天馬子今有天馬徑厥跡存焉

元微之曰德宗皇帝以八馬幸蜀七馬道斃唯望雲
騅來往不頓貞元中老死天廡臣稹作歌以記之憶
昔先皇幸蜀時八馬入谷七馬疲肉綻筋攣四蹄脫
七馬死盡無馬騎天子蒙塵天雨泣巉岵道路淋漓
濕崢嶸白草眇難期諠洞黃泉安可入朱泚圍兵抽
未盡懷光寇騎追行及嬪娥相顧倚樹啼鴉鷺無聲
仰天立圍人初進望雲騅衫色顛顛衆馬欺上前噴
吼如有意耳尖卓立節踈竒君王試遣迴胃臆撮骨
鋸牙駢兩肋蹄懸四躅腦顛方胯聳三山尾抹直圍
人畏誚仍相惑此馬無良空有力頻頻嚙掣轡難施

往往跳趨鞍不得色沮聲悲仰天訴天不遣言君未
識亞身受取白玉羈開口銜將紫金勒君王自此方
敢騎似遇良臣又悽惻龍騰魚鼈淖然驚驥盼驢騾
少顏色七聖心迷運方厄五丁力盡路猶窄橐駝山
上斧刃堆望秦嶺下垂頭石五六百里真符縣八十
四盤青山驛掣開流電有輝光突過浮雲無朕跡地
平險盡施黃屋九九屬車十二纛齊映前導引驢頭
帝自奉天奔梁道險澁齊映常為帝御會馬駭突帝
命捨轡映曰馬奔踈不過傷臣捨之或驚清蹕嚴震
迎號抱驢足時震為山南西道節度使聞帝徒蹕馳

表奉迎路傍垂白天實民望驢禮拜見驢哭皆言亥
宗當時無此馬不免騎騾來幸蜀雄雄猛將李令公
李晟也收城殺賊豺狼空天旋地轉日再中天子却
坐明光宮朝廷無事忘征戰校獵朝回暮毬宴御馬
齊登擬用槽殿中號乘輿之馬曰擬用槽君王自試
宣徽殿圍人還進望雲驢性強步闊無方便分驥擺
仗頭太高擘肘迴頭項難轉人人共惡驢迴跋潛遣
飛龍減芻秣銀鞍繡韉不復施空盡天年御槽活當
時鄒諺已有言莫倚功高浪開闊登山縱似望雲驢
平地須饒紅叱撥長安三月花垂草果下翩翩紫騮

蜀中人物 卷之一
好千官煖熱李令閒平朱泚之後天子既厭兵患將
臣生事而張延賞當國復與晟有隙勸帝奪其兵柄
百馬生瘳望雲老望雲騅爾之種類世世竒當時項
王乘爾祖分配英豪稱霸王爾身今日逢聖人從幸
巴渝歸入秦功成事遂身退天之道何必隨羣逐隊
到死蹋紅塵望雲騅用與不用各有時爾勿悲

資暇集云成都府出小駟以其便於難路號為蜀馬
今宣城郡亦有小馬時人皆呼為宣州蜀馬也晉史
明帝密知王敦將舉兵內向乃乘巴滇駿馬微行至
于湖陰察敦營壘敦覺而追帝帝乃馳去馬有遺糞

處輒以水灌之北魏李孝伯宣旨語張暢曰若須六
馬魏主當送脫須蜀馬亦有佳者唐人朝武懿宗曰
長弓度短箭蜀馬臨階碼蓋以蜀馬之低尚須臨階
乃得上其無超距之勇自見字書碼音匹轉躍而上
馬也大都蜀馬短少精悍俯仰便捷亦地勢使之然
耳予閱後梁春秋武陵王紀在蜀器甲殷積有馬八
千匹元和郡縣志劔南節度唐都管兵三萬四千七
百人馬三千匹蜀檮杌王建武成二年講武於星宿
山步騎二十萬官馬八千私馬四千雖各侈其盛而
神駒名駿未常旦暮遇之者及觀渝州志載謨烈輯

遺云洪武四年明昇以全蜀降獻良馬十其一色正
白蓋得之於羅鬼國養龍坑牝馬與龍交而生者身
長十有一尺首高數尺足之高比首殺其二尺有肉
隱起項下約厚五寸廣三寸餘貫脉絡腹至尾間而
上精彩明晃振鬣一鳴萬馬為之辟易韉勒近前則
作人立而吼

上謂天既生此英物必有神以司之親撰祝冊詔有
司以牲醪祀于馬祖然後勅典牧副使高啟囊沙四
百斤壓之人跨囊沙上使之游行苑中久之性漸柔
馴適八月癸巳上將行朔月禮於清涼山壇於是乘
之而出如躡雲而馳一塵弗驚皇情悅豫賜名飛越
峰復命御用監馬晉臣繪其行藏焉斯蓋不世出之
物以待不世出之

主也噫真神哉

鄭祭開天傳信記云玄宗將登封泰山益州適進白
騾潔朗豐潤權奇偉異上遂親乘之柔習安便不知
登降之倦也告成禮畢復乘而下至山坳少休有司
奏白騾無疾而殪上歎異久之謚曰白騾將軍命有
司具槥櫨以葬之壘石為墓在封禪壇北里許
華陽國志秦昭襄王時白虎為害自秦蜀巴漢患之

乃重募有能殺虎者邑萬家金帛稱之於是夷胸忍
廖仲藥何射虎秦精等乃作白的弩於高樓上射虎
中頭三節白虎常從羣虎瞋恚盡搏殺羣虎大响而
死按天官書參為白虎蜀當井參分野故白虎常為
害也

朝野僉載周武后永昌中涪州多虎暴有一獸似虎
而大逐虎噬殺之錄奏檢瑞應圖乃酋耳也不食生
物有虎則殺之

蜀記文翁在蜀日常言少力田方聚柴為陂未就夜
有百十野猪鼻載土著柴中比曉塘成稻常倍收又
嘗欲斷一大樹指斷處去地一丈八尺祝曰吾得
千石斧當着此處因擲之正着欲砍處

爾雅摩牛註云摩音麻重千斤出巴中犂牛註云牛
之大者出蜀中山海經曰岷山多犍牛犀象晉興元
年此牛出上庸郡人弩殺之得三十擔肉博物志曰
越雋國有牛稍割取肉經日必復生如故按玄中記
云割而復生名曰反牛矣莊子云犂牛大若垂天之
雲註云出荆夔間角向前毛白如雪今人常以為拂
子方物志云犂牛出西羗尾長而動中國以為纓人
或射之則自斷其尾若左氏所謂雄鷄也闕駟十三

州志云旄牛縣屬蜀郡出旄牛歲貢其尾以為節旄
宋孔寧子犖牛賦曰惟茲獸之攸生亦棲遐而憑阻
道綿野於岷隅挹清源於庸渚奔逸躅而倫於載賁
首而亂矜茸長鬣之髮鬣戾狼情而首鼠邁羔羊之
如膏侔蜉蝣之楚楚既作表於禮樂又為容於軍旅
奉藩岳之休明被戎荒而既序班駟賂而來庭超笱
藹乎其所矣

爾雅云南方之美者有梁山犀象焉巴浦之犀其可
遇乎常璩云會無土地時產犀牛江表傳曰諸葛亮
討賊還成都孫權遣勞問之送馴象一頭與劉禪予
觀 國史傳征虜圍成都偽相戴壽等驅象出戰而
今不可得也

爾雅云麇大羊疏略曰西域多兩角有一角者為勝
角甚多節蹙蹙圍繞別有山羊角極長惟一邊有節
節亦踈大而不入用羗夷云此即名麇羊一名龍羊
益州方物略龍羊以上蕃及威茂州形似蓄羊而大
其角繚繞重八九兩黑質而白文可以為帶胯其用
亂犀贊曰羊質而大角繚于首以角之珍軀殘獵手
按本草麇羊質堅可碎金剛一絲貫頂持入耳邊自
鳴能清肝肺熱夜眠倒掛于樹上人覓之不可得禪

家有麀羊掛角之喻也市所鬻者山羊耳益部談資云羴羊皮毛色青兵中臥之有警則自動又云羊名蟠者其角年久而蟠皮可坐數人恐亦祇可作談資也

唐書張說為相時玄宗意欲討吐蕃說密奏許其通和以息邊境玄宗不從及瓜州失守王君奭死說因獲雋州鬪羊上表獻之以申諷諭其表云臣聞勇士冠鷄武天戴鶡推情舉類獲此鬪羊遠生越雋蓄性剛決敵不避強戰不顧死雖為微物志不可挫伏惟陛下選良家於六郡求猛士於四方鳥不遁才獸不

藏伎如蒙効竒靈圃角力天塲却鼓怒以作氣而躑躅以奮擊跌若奔雲之交觸碎如轉石之相叩裂骨賭勝濺血爭雄敢毅見而衝冠鷲狼聞而擊節異將少助明主市駿骨楫怒蛙之意也若使羊能言必將曰若鬪不解立有死者所賴至仁無殘量力取勸焉臣緣損足未堪履地謹遣男詣金明門奉進玄宗深悟其意賜絹及雜絲一千匹是則以鬪止鬪以羊活人賢于大宛馬叩竹杖遠矣

韻會云益州有鹿麀乃鹿之美者蜀州古有鹿市之說今不能有也蜀都賦云射噬毒之鹿註云有神鹿

蜀中名物 卷之一
兩頭主食毒草名曰食毒鹿出雲南郡此魏宏南中所記然汶山亦有之九州要記云汶山有食藥鹿其腸中糞亦療毒疾是矣

晉史泰始年白鹿見梁州刺史杜幼文以聞游梁雜記榮經山中畋人得一白鹿將以獻邑侯其鬣如銀兩角透明角尖挂一銅牌上有數字磨勘莫辨惟一唐字稍現邑侯命釋之

蜀中亦往往有白兔嘉靖初獲自梁山者守臣導諛以獻不久尋斃而建亭豎碑焉今謂之白兔亭也酉陽雜俎引常絢云巴州兔皆作狸斑寰宇記云蜀中舊無兔鴿隋王秀鎮益州命左右齎往鴿尚稀而兔已衆矣

詩話云川北山中多麝絕愛其臍每為人所逐勢且急卽自投高巖舉爪裂出其香就繫而死猶拱四足以保其臍李商隱詩投巖麝褪香以此青城外史載嵇康云麝食栢而香今吐蕃山中最多麝但此獸好食蛇中散之言未為實錄也然今之名存而實亡者何必麝然

猿蜀郡山中多有之惟三峽最著酈道元云魚復縣廣陵峽多猿猴不生北岸非唯一處或有取之放著

北山中初不聞聲將同貉獸渡汶而不生矣此三峽之首也荊州記曰峽中猿鳴至清諸山谷傳其響泠泠不絕行者歌之曰巴東三峽猿鳴悲猿鳴三聲淡霑衣然其通臂善緣騰空攬蔓能於空中輪轉以磊礫擲于下舟人避之陳蕭詮詩桂月影才通猿啼迥入風隔巖還嘯侶臨潭自響空挂藤疑欲飲吟枝似避弓別有三聲淡霑裳竟不窮杜甫詩云裊裊啼虛壁蕭蕭掛冷枝艱難人未免隱見尔應知慣習元從衆全生或用竒前林騰每及父子莫相離曹松詩云會宿三巴路今來不願聽雲根啼片白峰頂擲尖青

護果憎禽啄栖霞覩葉零唯應卧嵐客憐爾傍岳扃此皆狀其輕便險絕之致也馬戴詩云日飲巴江水還啼巴岸邊秋聲巫峽斷夜影楚雲連露滴青楓樹山空明月天誰知泊船者聽此不能眠皎然詩云萬里巴江水三聲月峽深何年有此路幾客共沾襟斷壁分垂影流泉入苦吟淒淒離別後聞此更傷心此皆觸其別離羈旅之緒也岑參在郡邸聽猿詩云峨眉烟翠新昨夜秋雨洗分明峰頭樹倒插秋江底又別二室間圖它五斗米哀猿不可聽北客淚如涕崔塗在僧舍聽猿詩云哀猿聽未休禪景夜方幽暫得

同僧靜那能免客愁影搖雲外樹聲裊月中秋曾向
巴江宿當時淚亦流段成式在書齋聽猿詩云却憶
書齋值晚晴挽枝閑嘯激蟬清影沈巴峽夜巖色蹤
絕石塘寒瀨聲是境雖不同而調則皆苦矣

王周

集施

南太守以猿兒為寄云得之黔中頭生即白

者作詩荅之云虞人初獲自江西長臂難將意馬齊
今日未啼頭已白不堪深入白雲啼此白頭猿也

禹貢梁州貢熊羆狐狸織皮西京雜記熊羆毛有綠
光長二尺者直百金卓王孫有百雙詔使獻二十枚

西山經云西百七十里曰南山多猛豹似熊而小毛

淺有光澤能食蛇及銅鐵按子虛賦有鋌猛氏格蝦
蛤孟康曰皆獸名郭璞曰今蜀中有猛氏獸似熊而
小毛淺有光澤也

蜀都賦戟食鐵之獸註貊獸毛黑白臆似熊而小以
舌舐鐵須臾便數十斤出建寧郡其皮毛麓厚中葶
席爾雅貊即白豹唐世多畫作屏白傳有贊序之抱
朴子東方識啖鐵之獸寔賴神禹之書大荒之籍

游梁雜記云棘夷有火獸形如黑羊兩角尖舉火夜
光燭天出沒不常棘人一見即合村戶鳴鑼逐之獸
驚入井即以火血投入遲則火從井中出焰及禾苗

田畦屋舍盡成焦土其地三年不植

博物志云蜀山南高山上所有物如獼猴長七尺能人行健走名曰猴獾一名化或曰猴獾伺行道婦女美者輒盜去人不得知行者每過其傍皆以長繩相引然故不免此得男女氣自爾故取勇也取去為室家其年少者終身不得還十年之後形皆類之意亦迷惑不復思歸有子者輒俱送還其家產子皆如人有不食養者其母輒死故無敢不養也及長與人無異皆以楊為姓一作羊馬姓此唐蒙所記矣

珙志有獸曰野干似猿髮長過面欲有所視則搖頭以手披之

方物略云獲出邛蜀間與猿獠無異但性不躁動肌質豐腴蜀人炮蒸以為美味也贊曰獲與猿獠同類異種彼美豐肌登俎見用

呂氏春秋曰禹年三十未娶行塗山恐時暮失嗣辭曰吾之娶必有應也乃有白狐九尾而造於禹禹曰白者吾服也九尾者其證也於是塗山人歌曰綏綏白狐九尾龐龐成子家室我都悠昌乃娶塗山氏山海經曰武都之山黑水出焉其上有玄狐蓬尾註大尾也

蜀地志曰涪陵南界榛險中有果然獸形如狗子頭似虎尾柔滑白黑色皮以為裘輕煖可珍其身不過三尺尾長四尺餘脇邊皆斑集十皮可得一褥繁紋麗好細厚柔澤段氏遊蜀記云戎州進果然褥阜褐碧三色相間云出馬湖江石門兩路蠻界內宋樂史子正作蜀中詩云又聞猓然獸死不相棄遺按國史補得一猓然則數十可得蓋此獸不忍傷其類雖殺之不去獸狀而人心者也

益州方物略猓威茂等州南詔夷多有之大小正類猿惟毛為異朝制內外省以上官乘馬者得以猓為精武官則內客省使宣徽使乃得用贊曰狀實猿類體被金毳皮以藉馬中國之貴李廌師友談記云猓座文臣兩制武臣節度使以上許用每歲九月乘三月撤無定日視宰相乘則皆乘之撤亦如之猓似大猴生川中其脊毛最長色如黃金取而縫之數十片成一座價直錢百千杜詩云猓擲寒條馬見驚此即郡國志戎州棘道縣有獸名獬狶似猿而四足短一騰一百五十步如迅鳥之飛取此皮為狐白之用盈百方成按猓黑身白腰手有長白毛者是蜀都賦晶羆垝於萋草註謂羆垝虎豹之人也博物

志江漢有羆人卽此

楊大年談苑淳化中綿州貢羅江犬常循於御榻前
太宗不豫犬不食及上僊號呼涕泗以至疲瘠見者
隕涕參政李至作桃花犬歌以寄史館錢若水末句
云白麟赤鴈且勿書願君書此警浮俗按羅江縣西
雲蓋山之桃花溪出此犬毛赤白相間若桃花色傳
以為桃神所萃卽能改齋所云綿州八子之一也宣
室志云郭司空釗太和中自梓潼移鎮西京命閹者
為市綾繒絲帛百餘段其價倍以為欺卽囚於獄用
致其罪獄具命答之忽有十餘犬爭擁其背吏卒莫

能制釗大異之且訊其事閹者曰某好閱金剛經自
孫稚常以食飼羣犬不知其他釗歎曰犬尚能感人
惠吾安可以不施恩遂釋之噫此二犬者真可以媿
人

蜀中方物記卷之二

閩中曹學佺能始著

鱗介

常璩云魚復縣有澤水神天旱鼓其傍卽雨故蜀都賦云潛龍蟠於沮澤應鳴鼓而興雨也公孫述據蜀殿前井中有白龍出以為瑞應因自號白帝改元曰龍興卽此地矣

後漢書桓帝永康元年八月巴郡奏黃龍見郡池中史傳堅言于時民以天熱欲就池浴見池水濁因戲相恐此中有黃龍語遂行人間聞郡欲以為美故言

及建安二十三年黃龍見犍為武陽之赤水九日昭
烈以為已受命之祥立廟赤水溪上以祀之有碑曰
黃龍甘露之碑

晉書泰始二年七月黃龍見巴西閬中咸寧二年十
月黃龍二見于漢嘉靈關水經注越雋靈道縣有銅
山山人有劉慈者晉泰始九年黃龍二見于慈池縣
令董玄之率吏民觀之以白刺史王濬濬表上之因
改護龍縣也

任豫益州記云嘉魚蜀郡處處有之狀似鯉而鱗細
如鱒肉肥而美大者五六斤食乳泉出丙穴者二三
月隨水出穴八九月逆水入穴郡國志嘉魚蜀中謂
之拙魚亦謂之魚舅也錄異記曰嘉魚鯁魚也形如
鱒人以芭蕉葉隔火炙之肥美莫及宋祁方物志云
南有丙穴厥產嘉魚鯉質鱒鱗為味珍腴楊慎異魚
贊云南有嘉魚出於丙穴黃河味魚嘉美相頡最宜
為鯁隔以蕉葉不爾脂腴將滴火滅又云嘉州魚舅
載新厥名鱗鱗迎媵夫豈其甥其文實鮐江圖可徵
方物略云黑頭魚形若鱒長者及尺出嘉州歲三月
則至惟郭璞臺前有之里人欲怪其說則言璞著書
臺下魚吞其墨故首黑贊曰黑首白腹修體短額春

則羣泳促暑斯獲嘉州又有客朗魚似鮓肉嫩而美不恒有也

荆州記魚復古縣名土人謂鱣鯉至此復回不再上也水經注魚復縣巴鄉村側有溪溪中有魚其頭似羊豐肉少骨美於餘魚矣

韻會云鮓魚蜀曰鮓鱣出鞏山穴中三月遡河上能度龍門則為龍李奇注子虛賦周洛曰鮓蜀曰鮓毛詩義疏曰鮓似鱣而色青黑頭小而尖如鐵堦釜口在頷下大者七八尺益州人謂之鮓鱣大者王鮓小者叔鮓也註爾雅曰鱣大魚也似鱣而短鼻口在頷

下體有邪行甲無鱗肉黃大者長二三丈江東人呼為黃魚酉陽雜俎曰蜀中每殺黃魚天必陰雨南中八部志曰邛河縱廣岸二十里深百餘丈有大魚長一二丈頭特大遙視如戴鐵釜狀越雋志衛北二十五里魚洞河源出吐蕃合羅羅河入大渡河其中出大魚漢志邛部河長魚是也

方物略云鮓魚出蜀江背鱗黑而膚理似玉蜀人以為鱣味美贊曰比鮓則大膚縷玉瑩以膾諸庖無異雋永又云沙綠魚魚之細者生隈瀨中狀若鮓大不五寸美味蜀人珍之贊曰長不數寸有駁其文淺瀨

曲隈唯泳而羣又云石鱉魚狀似鮒魚而小上春時
出自石間庖人取為奇味贊曰鰕鱗之質本不登俎
以味見錄雖細猶捕

魏武食制云蜀有蒲魚其形如粥出于郫縣蒲村之
麓廣志曰武陽小魚大如針號一斤千頭蜀人以為
醬也

酉陽雜俎鮓魚如鮎四足長尾能上樹天旱輒含水
上山以草葉覆身張口鳥來飲水因吸食之聲如小
兒峽中人先縛之於樹鞭之身上白汗出如溝汁去
此方可食不爾有毒鮓志作鮓范鎮東齋筆錄作鮓
方物略云鮓魚出西山溪谷及雅江狀似鮓有足能
緣木其聲如兒啼蜀人豢之贊曰有足若鮓大首長
尾其啼如嬰緣木弗墜

蜀都賦石鱮水螭註石鱮石魚也如石燕石蟹之類
巴郡志溫泉夾有魚生長血湯中不可合名神魚
洪雅志有人魚其手足似人寰宇記魚虵水在青神
縣水有魚似虵即魚耶江也又云維州產魚虎有舌
口如棘能食魚

東坡云予別業前泉水相傳有二牝豬潛其中化為
二鯉蓋豬龍也一日偶見之以告妻兄王愿疑予誕

同禱於泉見二鯉躍出今眉州南石佛鎮是其處
丹淵集史少訥見許江豚未得以詩戲之云霜重水
落岸有水江豚乘寒弄晴日搖波拍浪乍羣起尾厚
喙長鬚鬣赤漁人清曉橫巨舟一舉大網凡數頭想
君盤筓已厭足何不略遣來陵州是時與可守陵州
故云

揚雄蜀本紀云張儀城成都輒頽壞時見大龜出於
江迴旋而行儀以問巫巫曰循龜迹築城功可就乃
從之至今蜀人呼為龜城戎幕閒談曰予未至郡日
嘗聞龜殼猶在成都昨詢訪耆舊有軍資庫官宇文
遇者言比常在庫中元和初節度使高崇文命工人
截為腰帶胯具自張儀至崇文千餘載古物尚在而
武臣泯之深可惜也

爾雅注云涪陵出大龜緣中义似璚瑁卽今甯螭龜
一名靈螭能鳴譙周異物志曰涪陵龜其甲可以卜
卽此魏元帝奐之世獻靈龜于相府因名其地為龜
溪矣

劉敬叔異苑云元嘉初益州刺史遣三人入山伐樵
迷路忽見一龜大如車輪四足各躡一小龜而行又
有百餘黃龜從其後三人叩頭請示出路龜乃伸頭

蜀中物志 卷之二
若有意焉因共隨逐得出有捉小龜歸家以為臠者
須臾暴死

錄異記云有於蜀江之上獲巨鼈者長尺餘其裙朱
色煮之經宿遊戲自若又加火一日水涸而鼈不死
舉家驚懼以為龍類也乃投於江中浮泛而去

山海經曰岷山江水出焉其中多鼃郭註鼃似蜥蜴
大者長二丈有鱗彩皮可以冒鼓元和郡縣志利州
綿谷縣穿山一名胡頭山有山鼃伏於空處皮可為
甲刀箭所不能入

瑯嬛記云王吉夜夢一蟊螟在都亭作人語曰我豈
口當舍此吉覺異之使人于都亭候之司馬長卿至
吉曰此人文章當橫行一世天下因呼蟊螟為長卿
卓文君一生不食蟊螟

蟲

本草金蠶始于蜀中狀如蠶金色日食蜀錦四寸實
宇記成都聖壽寺有青衣神祠神卽蠶叢氏也相傳
蠶叢氏始教人養蠶時家給一金蠶後聚而弗給瘞
之江上為蠶墓宋魯應龍閑牕括異云金蠶色如金
食以蜀錦取其遺糞置飲食中毒人必死善能致他
財使人暴富遣之極難雖水火兵刃不能害多以金

銀藏篋置其中投之路隅人或收之以去謂之嫁金
蠶也

爾雅獨者蜀也蜀蟲名此虫大如指似蠶而無羣故
云蜀

山海經云巴蛇食象三歲而出其骨君子服之已心
腹之疾其為蛇青黃赤一曰黑蛇青首在犀牛西郭
璞贊曰象實巨獸有蛇吞之越出其骨三年為期厥
大何如屈生是疑王堂閒話云有遊於瞿塘峽者冬
月草枯野火燎其峰巒連山跨谷紅焰照天忽聞巖
岸之間大石崩墜輪磴有聲遂駐足伺之見一物圓

如大困硯至平地細看乃一蛇也遂剖而驗之乃吞
鹿於腹因野火燒而墮耳元稹巴蛇詩序云巴之蛇
百類其大蟒其毒寒鼻蟒人常不見寒鼻常遭之毒
人則毛髮皆豎起飲溪澗而泥沙盡沸驗方云攻巨
蟒用雄黃烟被其腦則裂而鸚鵡音滌屬鳥能食其小者

巴無是物其民常用術禁之尤効詩曰巴蛇千種毒
其最鼻寒蛇掉舌翻紅焰盤身蹙白花噴人豎毛髮
飲浪沸泥沙欲學叔敖瘞其如多似麻又越嶺南濱
海武都西陷戎雄黃假名石鸚鳥遠難籠詎有隳腸
計應無破腦功巴山晝昏黑妖霧毒濛濛又漢帝斬

蛇劍晉時燒上天自茲繁巨鱗往往壽千年白晝遮
長道青溪蒸毒烟戰龍蒼海外平地血浮船

大荒南經曰榮山黑水之南有玄蛇食塵郭璞註今
南方蚺蛇吞鹿亦此類風俗通曰車騎將軍巴郡馮
緄為議郎發綬笥有二赤蛇可三尺分走南北大用
憂怖卜云此吉祥也當為邊將以東為名後五年果
為大將軍拜遼東太守

北夢瑣言王蜀先主時修斜谷閣道鳳州衙將白某
掌其事至武休潭見一婦人浮沉水面意其溺者命
役夫鈎致岸濱忽化為大蛟沒於潭中白以為不祥

因而致疾予誦岑參招北客賦云瞿塘之東下有千
歲老蛟化為婦人袷服靚粧游於水濱白聞之方悟
其為蛟也疾尋瘳岑賦所言斯足為證

又云蛟之為物不識其狀非有鱗鬣四足乎或曰虬
蛟蛟鯢狀如蛇南僧說蛟如馬鱉即水蛭也涎沫腥
粘掉尾纏人而噬其血蜀人號為馬絆蛇頭如猫鼠
有一點白漢州古城潭底有蛟人伐之乃躍于沙內
蟠蜿力困里人謹噪以助竟斃之故見斯狀

王堂閒話云巴賓之境民居溪壑以弋獵為生有一
嵌空洞穴深不能測獵師縱犬於此多呼之不迴瞪

目搖尾時有彩雲垂下迎犬而昇如是者累年呼為
狗仙山一獵師獨不信遂絊一犬挾藥弧往觀至則
以粗繩繫犬繫于拱木然後退身覘之及彩雲下犬
縈身不能上嗥叫者數四旋見有物頭大如瓮雙目
如電鱗甲光明冷照溪谷漸垂身出洞中顧其犬獵
師乃張毒矢射中之其物不復見經旬日臭穢滿山
獵師乃自山頂縊索下觀見一大鱗腐爛于岩間狗
仙之事遂絕

川東山南五溪黔中皆有毒蛇烏頭反鼻蟠草中以
尾倒鉤人去數步直來疾如激箭螫人立死中手斷
手中足斷足不然則全身腫爛百無一活謂之蝮蛇
又有黃喉蛇好蟠舍上無毒不害人唯善食毒蛇食
飽垂頭直下沫滴地噴起變為沙虱中人為疾額上
有大王字衆蛇之長常食蝮蛇又有碎蛇見人則分
身為數段人去復續如故

遊梁雜記云富順縣去城三十里有羅漢寺乃宋景
祐間建橫踞石梁水激之噴蹙注射浪湧濤翻嘗有
一白蛇逆波而來遊入隙竇間初隱隱若匹練俄而
蜿蜒丈許如牽玉繩且時巨時細時脩時短儵忽不
可控搏聞人笑語及梵唄聲愈逐響而來如抃如舞

蜀中人物 卷之二
少頃不知所歸土人謂是神物隱谿中已數百年一
名銀蛇溪

戎州志有虫曰螂蛆食蛇卽莊生所謂卽且甘帶也
噫蛇之為物毒矣其種類亦繁矣而尚有食之者此
事之不可知也

博物志云食巴豆之鼠三年重三十斤本草云鼯鼠
蜀人謂之鼯鼠取其毛作筆俊亦大也

劉敬叔異苑云成都有義鼠形如鼠短尾每行遮相
咬尾三五為群驚之卽散俗云見之者當有吉兆梁
州記曰唐公房登仙於智鄉山山有易鴈鼠一月三
吐易其鴈東廣微所謂唐鼠者也博物志云唐公房
升仙鷄狗竝去惟以鼠惡棄之鼠悔恨一月三吐其
鴈

寰宇記利州產鯖子按鯖小貝也鮒也音與積同周
禮註疏鯖小而楸他果切螺匾也東坡論字詩云壁
美何妨楸徐季海作字多匾坡公效之或謂之石壓
蝦蟆

景渙牧豎閑談云知邛州事龔穎建溪人卽真君靖
之遠孫真君昇天之後渙嘗病耳聾龔曰恨蜀中無
紫粉為子脩藥餌之立差因以尋常紫粉界之龔咲

曰此非真紫粉紫粉乃蘇枋樹間自然虫糞也是漢錯認紫粉五十年矣

嘉祐雜志峨眉雪蛆治內熱陸游云予至蜀乃知此物實出茂州雪山雪山四時常有積雪彌遍嶺谷蛆生其中雪時得之能蠕動雪消蛆亦消益部談資曰雪蛆產岷峨深澗其形如蝟但無刺肥白長五六寸腹中惟水身能申縮取食之須在旦夕間否則化北夢瑣言曰陳藏器本草砂俘卽倒行蝟子也蜀人號曰俘鬱旋穴乾土為孔常睡不動取致枕中令夫妻相悅愚遊成都止于逆旅與賣草藥李山人相熟

見蜀城少年往往欣然而訪李生仍以禮物酬酢詰之人曰客敬李生媚藥耳徵其所用乃砂俘也

胸腮音蠢潤地下濕則多此蟲劉禹錫嘉話云胸腮蚯蚓也常至夜江畔出其身半跳於空中而鳴上音屈下音忍說文曰胸腮從肉旬聲黃朝英云考其義當作潤蠢胸如順切腮尺允切與禹錫音不同按胸腮漢縣名今梁萬間是其地

爾雅土蠶地中作房啖其子卽馬蠶今荆巴間呼為蠶方物略云金蟲出利州山中蜂體綠色光若金里婦取以佐釵鐙之飾贊曰蟲質甚微翠體金光取而

稿之參飾釵梁酉陽雜俎蜀中有竹蜜蜂好於野竹
 上結窠窠大如鷄卵有蒂長尺許窠與蜜竝紺色可
 愛甘倍於常蜜方言云蟻螞虫梁益之間謂之略元
 積略蜂詩三首序云略亦蜂類而大巢在褰鼻蛇穴
 下故毒螫倍諸蜂虫中手足輒斷落及心胃則地裂
 用它蜂中人之方療之不能愈巴人往往持禁以制
 之則差詩云巴蛇蟠窟穴穴下有巢蜂近樹禽垂翅
 依原獸絕蹤微遭斷手足厚毒破心胃昔甚招鬼句
 那知眼自逢又梨笑清都月京師開元觀蜂游紫殿
 春構脾分部伍嚼藥奉君親翅羽頗同類心神固異
 倫安知人世裏不有噬人人又蘭蕙本同畹蜂虵亦
 雜居害心俱毒螫妖焰兩吹噓雷蟄吞噬止枯焚巢
 穴除可憐相濟惡勿謂禍無餘

方言曰蚍蜉西南梁益間謂之玄蚰陶弘景曰地膽
 出梁州狀如大馬蟻有翼太平廣記忠州墊江縣吏
 冉端唐開成初父死有嚴師者善山岡為卜地云合
 有王氣群聚之物掘深丈餘遇蟻城方數丈外重雉
 堞皆具子城譙櫓工若彫刻城內分徑街小垵相次
 每垵有蟻數千憧憧不絕徑甚淨滑樓中有二蟻一
 紫色長寸餘足作金色一稍小有羽細腰白翅翅有

經脈疑是雌者衆蟻約有數斛城隅小壤以堅土為
 蓋故中樓不損既掘露蟻大擾若求救之狀吏遽請
 縣令李玄之詣觀已勸吏改卜嚴師伐其卜驗為得
 地請遷蟻于巖側狀其所為仍布石粟覆之以板經
 旬嚴師忽得病若狂或自批觸穢詈大呼數日不已
 令素厚嚴因為祝蟻療以雄黃丸方愈元稹蟻子詩
 三首序云巴蟻衆而善攻欒棟往往木容完具而心
 節朽壞屋居者不省其微而禍成傾壓詩云蟻子生
 無處偏因濕處生陰靈煩擾攘拾粒苦譽譁音牀上
 主人病耳中虛藏鳴雷霆翻不省聞汝作牛聲又時

術功雖細年深禍亦成攻穿漏江海嗜食困蛟鯨敢
 憚椽欒蠹深防柱石傾寄言持重者微物莫全輕又
 攘攘終朝見悠悠卒歲疑詎能分牝牡焉得有螻蛄
 音緣池蟻卵也徙市竟何意生涯都幾時巢由或逢
 我應似我相期

微之又有蜘蛛詩三首序云巴蜘蛛大而毒其甚者
 身邊數寸而躋長數倍其絲網羅竹栢盡死中人瘡
 痛凜音集濕且痛癢倍常用雄黃苦酒塗所齧仍用鼠
 婦蟲食其絲盡輒愈療不速絲縈心而無及矣詩云
 蜘蛛天下足巴蜀就中多縫隙容長躋虛空織橫羅

縈纏傷竹栢吞噬及蟲蛾為送佳人喜珠櫛無柰何
又網密將求食絲斜誤着人因依方託緒挂胃遂容
身截道蟬冠礙漫天玉露頻兒童憐小巧漸欲及車
輪又稚子憐圓網佳人祝喜絲那知緣暗隙忽復齧
柔肌毒腠攻猶易焚心療恐遲看看長妖緒和扁欲
漣湏

微之又有蟲詩三首序云巴之山谷間春秋常雨自
五六月至八九月雨則多蟲道路羣飛噬馬牛血及
蹄角旦暮尤極繁多入常用日中時趣程逮雪霜而
後盡其鬪人痛劇浮蟻而毒不留肌故無療術詩云

陰深山有瘴濕熱草多蟲衆噬錐刀毒羣飛風雨聲
汗粘瘡痂痛日曝苦辛行飽爾咀殘腹安知天地情
又千山溪沸石六月火燒雲自顧生無類那堪毒有
羣搏牛皮若截噬馬血成文蹄角尚如此肌膚安可
云又辛螫終非久炎涼本遞興秋風自天落夏孽與
霜澄一鏡開潭面千峰露石稜氣平蟲豸音死雲路
好攀登

微之又有蟆子詩三首序云蟆蚊類也其實黑而小
不礙紗縠夜伏而晝飛聞栢煙與麝香即去蚊蟆與
浮塵皆巴蛇鱗中之細蟲耳故鬪人成疔秋夏不愈

膏楸葉而傳之則差詩云蝮子微於蚋朝繁夜則無
毫端生羽翼針喙嗜肌膚暗毒應難免羸形日漸枯
將身遠相就不敢恨非辜又晦景權藏毒明時敢噬
人不勞生詬怒祇足助酸辛隼皆看無物蛇軀虎有
鱗天方芻狗我甘與爾相親又有口深_世異趨時詎
可量誰令通鼻息何故辨馨香沉水來_治海崇蘭泛
露光那能枉焚_藝爾衆我微茫

蜀中方物記卷之二終

蜀中方物記卷之三

閩中曹學佺能始著

草

山海經高粱之山有草焉狀如葵而赤華莢實白柎
可以走馬

淮南子曰巫山之上從風縱火紫芝與蕭艾俱死抱
朴子曰慮巫山之失火恐芝艾之并焚矣福地記云
青城山上有沒溺池產甘露芝草也

李膺益州記云江州縣西南有仙池昔有仙人居池
側起樓多植香草於樓下忽一夕縱火自焚天降紫

雲飄然而去後人尚指此地為香草樓按列仙傳有園客者種五色香草積十年與妻俱仙去或即此宋祁方物略長生草山陰蔽地多有之脩莖茸葉色似檜栢而澤經冬不凋損故號長生贊曰色與栢類苒苒其莖冬不甚黃故謂長生

又曰瑞草蜀人多種之庭檻蔓延長三四尺珍而愛之故謂之瑞贊曰翠蔓紺若回繚可喜蔭之庭堂珍以為瑞

薛濤鴛鴦草詩綠英滿香砌兩兩鴛鴦小但娛春日長不管秋風早宋祁曰鴛鴦草春葉晚生其稚蘢在葉中兩兩相向如飛鳥對翔贊曰翠蘢對生甚似匹鳥逼而觀之勢若偕矯

虞美人草亦謂之舞草獨莖三葉狀如決明一葉在莖端兩葉居莖半而相對人或近之抵掌謳曲必動搖如舞也酉陽雜俎益州草木記以為雅州名山縣出行人唱虞美人曲則應拍而舞蜀志補鑄以為潼川州紫蓋山出動中音節移植他所則否唐人舊曲云帳中草草軍情變月下旌旗亂攬衣推枕愴離情遠風吹下楚歌聲正三更烏騅欲上重相顧豔態花無主手中蓮鐳凜秋霜九泉歸去是仙鄉恨茫茫按

此屬詠虞美人事而宋景文獨以虞當作娛意其草柔纖為歌氣所動故或動搖美人以為娛樂耳贊曰翠莖纖柔稚葉相當逼而歌之或合或張

方物略曰仙人綯與苔同種生岩陰石隈多鮮翠長二三尺叢垂若綯或言深谷有長丈餘者贊曰附陽而生垂若文綯大槩苔類土石所交

杜子美有從韋明府續處覓錦竹兩三叢詩黃鶴注云吹竹譜竹紀無錦竹意以其文如錦名之竹紀有莖竹高墮竹其皮類繡豈即此乎余觀錦竹他無見惟杜詩有之劉會孟批錦樹行云題曰錦樹使人刮

目錦竹亦新惜無枯出者耳近閱梅宛陵集錦竹詩云雖作湘竹紋還非楚筠質化龍徒有期待鳳曾無實本與凡草俱偶親君子室又注其下云此草也似竹而斑始知黃鶴有金注之昏耳出丹鉛錄

爾雅云蒼戎葵今蜀葵也華如木槿戎蜀蓋其所自出古今注曰戎葵一名芘芘有紅紫青白色莖葉不殊但花色異耳晉傅玄曰蜀葵其苗似瓜瓠既大而結鮮紫色耀日也酉陽雜俎云蜀戎葵一名胡葵大者紅可以緝為布枯時燒作灰藏火火久不滅花有重臺者予聞之蜀人燃其榦作炬雨中猶熾按淳化

帖所載唐太宗二十三日勅云鄉昨日道服蜀葵可
錄方將來亦皆紅葵也宋顏延之蜀葵贊曰井維降
精岷絡升靈物淑氣麗卉草之英渝艷衆葩冠冕羣
英類麻能直方葵不傾梁王筠蜀葵花賦曰惟茲竒
草遷花西道凌金坂之威夷跨玉津之浩浩值油雲
之廣臨屬光風之長掃仰椒屋而敷榮值蘭房而舒
藻邁衆芳而秀出冠雜卉而當闡既扶踈而雲蔓亦
灼樂而星微布濩交加蒨茸紛葩踈莖密葉翠萼丹
華岑參蜀葵花詩昨日一花開今日一花開今日花
正好昨日花已老人生不得怕少年莫惜牀頭沾酒

錢請君有錢向酒家君不見蜀葵花

長樂花今蜀人謂之月月紅也六朝謂之紫花晉傅
玄紫華賦曰紫華一名長樂花舊生於蜀其東界特
饒中國竒而種之余嘉其華純耐久可立冬而服故
與友生各為之賦云有遐方之竒草稟二氣之純精
仰紫德之景曜因令色以定名剛莖勁立纖條繁列
從回風以搖動紛蘭暢而蕙潔蔚青葱以增茂並含
華而未發於是散綠葉秀紫榮蘊若芝草之始敷灼
若百枝之在庭獨參差以照耀何光麗之雜形煥煥
昱昱而奪人目精下無物以借喻上取象於朝霞妙

萬物而比豔莫茲草之可嘉唐蘇頌長樂花賦序曰
蜀太守庭際有紫華草秋中始繁支露洗冬早尚直
本霜封蕪雜大同於衆卉盛衰小異於羣物余訝而
未識吏或告余曰此傳長虞所賦蜀長樂花也故心
暗賞焉因口授書吏逐墨而成作恨不見古人所為
得髣髴其旨爾夫長者以短長之形度其長者則美
夫樂者以哀樂之類同其樂者則喜長也樂也吾安
得而聞之嘉織植之並用偉令名兮在茲徒見其豐
族萃尊高保璀璨莖丹外而縞中葉縹分以紅貫綴
綠穎之重疊紫紫蕤之爛熳迫而象之君子其常或

微或章聳危冠兮纓若綬默退靜其何望遠以意之
佳人欲翔炫炫煌煌重羅綺兮撲瑤萃蹇來思而未
嘗匪以幽兮自直匪以直兮自藏匪以晚兮自耀匪
以耀兮自強文濁露之均灑庇清舒之汎光本無嫌
於散地甘有寓於殊方然則太液初滿上林新霽莘
茸灼樂萬品千計搖瑞色而函芝雜竒葩而轉蕙孰
與夫玉堂金闕之偏賞白日青雲之特麗歲不與兮
時向闌風蕭蕭兮夜漫漫賓遠鴻於沙塞叫離鶴於
江干君曾不見三月華矣盡林間之稿木千霜殞矣
亦庭下之枯蘭懿此常度凌於早寒假春期而不採

雖秋令而不殘衝雨霰之飛薄任雲山之險艱芳弗
珍於霍靡節常慕於檀欒吾則知樹背之奚託傾心
之可安如後凋之是貴罔獨立其誰觀文學掾起而
為辭曰白露瀼瀼何草不黃紫華的的生君之堂彼
不伐兮秋自翳時或珍兮君是憇彤庭赫兮朱草駢
交屈軼兮友賓連伊榛莽而荒些君曷為兮賦旃
方物略云旌節花條脩華碧皆層層而擢正類使所
持節然故以名見益州圖經贊曰擢條亭亭層層紫
丹狀若使節方圖實刊蜀檮杌云王處回在蜀有道
士稱朱桃椎謁于前以劒撥土取花子一粒種之

須臾成花三朶謂處回曰此仙人旌節花也

方物略曰鵝毛玉鳳花本至卑纖蓬如釵股秋開不
藹而鬚狀似禽故曰鳳色白故曰玉以其分輕故曰
毛贊曰華而無采狀類翔鳳幺質毛輕翩欲飛動
又曰添色拒霜花生彭漢蜀州花常多葉始開白色
明日稍紅又明日則若桃花然贊云自濃而淺花則
常態今顧反之亦物之怪

又曰羞寒花蜀地處處有之不為人所愛依莖綴花
蔽葉自隱俗曰羞天花予易為羞寒花按本草名鬼
臼贊云冒寒而茂莖脩葉廣附莖作花葉蔽其上以

其自蔽若有羞狀

青城志云宋仁宗踐祚之六年縣奏上清宮庭木生異花錫名曰太平瑞聖宋祁方物略瑞聖花出青城山中幹不條高者乃尋丈花率秋開四出與桃花類然數十跗共為一花繁密若綴先後相繼而開九閱月未萎也蜀人號豐瑞花故程相國琳為益州年繪圖以聞更號瑞聖然有數種其小者號寶仙淺紅者為醉太平白者名玉真成都人競移蒔園中以為尤玩云贊曰衆跗聚英爛若一房有守繪圖厥名乃亭繁而不艷是異衆芳范成大詩雪外捫參嶺烟中濯

錦洲密攢文杏藥高結綵雲毬百世嘉名重三登瑞氣浮挽春同住夏看到火西流

圖經云蘭生於深林石門尤多有春蘭秋蘭宗蘭鳳尾蘭竹蘭石蘭春蘭花生於葉之下宗蘭花生於葉之上黃魯直幽芳亭記云一幹兩三花而香有餘者蘭一幹十數花而香不足者蕙按石門在敘府慶符縣占捷為郡地諺云雅州蘭烏尤蕙則蘭蕙固自有分也

蜀中有花名賽蘭香花小如金粟特馥烈戴之髮髻香聞十步經月不散佛經云天末香莫若牛頭旃檀

天澤香莫若詹糖薰陸天華香莫若檠蒲伊蘭則伊
蘭即此花也西域以之供佛後漢書所謂伊蒲之供
矣

成都府治西園有辨蘭亭為呂大防李大臨李之純
三人倡和處微仲之言曰蜀有草如護紫莖而黃葉
謂之石蟬而楚人皆以為蘭蘭見於詩易而著於離
騷古人所最貴而名實錯亂迺至於此予竊疑之迺
詢諸游仕荆湘者云楚國之有蘭舊矣然鄉人亦不
知蘭之為蘭也前此十數歲有好事者以色臭花葉
驗之於書而名始著况他邦乎予於是信以為蘭攷

之楚辭又有石蘭之語蓋蘭蟬聲近之誤蘭其葉冬
青其華凌寒其生沙石瘠土而枝葉峻茂其芳不外
颺暖風晴日有時而發則郁然滿乎堂室是皆有君
子之德此古人之所以為貴也迺為小亭種蘭於其
旁而名曰辨蘭無使楚人獨識其真者斯命亭之意
也

方物略云石蟬花始生其莖森擢長二三尺葉如菖
蒲紫萼五出與蟬甚類綠黃相側蜀人名其白者為
玉蟬花贊曰有茗穎然有萼敷然取其肖象莫類于
蟬

本草蟬花出蜀中其蟬頭上有一角如花冠狀謂之蟬花方物略蟬花二川山林中皆有之蟬不蛻者至秋則花其頭長一二寸黃碧色治小兒瘰癧又能已瘡贅曰蟬不能蛻委于林下花生厥首茲謂物化方物略云七寶花條葉大抵玉蟬花類也其生叢蔚花紫質絳贊曰擢穎挺挺盛夏則榮丹紫合英以寶見名

又云朝日蓮花或黃或白葉浮水上翠厚而色澤形如菱花而差大開則隨日所在日入輒斂而藏于葉下若葵藿之傾太陽然贊曰素花碧葉浮秀波面日中則向日入還斂能改色云宋景文筆記謂蜀中有蓮大如雀鷖葉舒如錢幹亦有絲其萼盛開而向日朝則指東亭午則遡南夕則西指隨日所至蜀人名曰朝日蓮予按鄭熊番禺記海南有向日蓮花似木芙蓉而極香開時東西向至暮而斂一呼夜合即此花也

敘志云西番蓮出夷地有黃赤二種幹圍六七寸葉長尺餘花如千葉蓮狀又一種幹如良薑長六七尺葉如芭蕉長三四尺花赤每花三四十瓣下瓣長四五寸至其端以漸而短瓣直聳不似蓮狀二三月花

至冬方厭俗亦呼西番蓮

方物略云紅蕉花于芭蕉盖自一種葉小其花鮮明可喜蜀人語染深紅者謂之蕉紅盖倣其殷麗云贊曰蕉無中幹花產葉間綠華外敷絳質疑殷金堂志有花名孤燕傳書

木

山海經曰廣都之野靈壽實華蜀都賦云靈壽桃枝注靈壽木出涪陵郡國志云南鄉峽西八十里有巴鄉村溪中多靈壽木也

益州記云棘道縣有荔枝灘灘東南二十里山頂有一冢唯生女貞樹樹上常有白猿栖息郡國志云棘道有玉女冢生女貞處是矣

灌縣有秦時紫栢團團如盖大可蔽畝其鄉名紫栢鄉知縣雷叔聞畫圖見遺因作讚曰有赤甲丈人者居於青城之陽厥生在祖龍之紀歷漢及唐有客伐之鼓鐘鏜鏜維神保護爰及我明中懷嘉果鳴鶴來翔其葉如髮其幹如石東榮而西殪圍丈有八尺其高四倍臨於大荒以孔檜為父以五大夫為兄九州之內此二三者繫其可相望

石室有二古栢見唐宋詩如裴劍李石蘇軾等集成

都古今記中亦載之後有人請于府恐此栢壞屋欲
去之李知幾曰屋壞尚可脩栢伐不可復併舉東坡
詩蒼苔高映室古栢文翁庭句爭之始得全方舟詩
云嬌榮落盡雪霜浮偃蹇空貽社櫟羞濡沫東家雖
借潤風烟西爽亦宜秋皮災已覺神明露心在猶懷
剪伐憂鐵鎖何當絆龍脚夜深雷雨卷潭湫其二云
思人誰復念婆娑窟室崖陰未易磨四十圍間看溜
雨三千年後數恒河不堪與世供狙杙尚許遺民占
鳥窠從此便名夫子樹康人斤斧奈予何然他日方
舟有送浩姪成都學官詩云似聞禮殿栢久已尋斧
柯則此栢亦不存矣

楊師魯集云綿竹武都山嚴仙觀雙闕內有漢時古
栢叅雲雁行而立人于蒼翠中行數百步始至栢老
而中虛可容六人圍坐夜或有光人稱君平餌丹以
餘粒埋栢樹下使然也

本草益州諸葛廟中大栢相傳是蜀世所植故人多
采以作藥其味甘香異常栢也杜甫詩孔明廟前有
老栢柯如青銅根如石霜皮溜雨四十圍黛色參天
二千尺君臣已與時際會樹木猶為人愛惜雲來氣
接巫峽長月出寒通雪山白憶昨路繞錦亭東先主

武侯同闕宮崔嵬枝幹郊原古窈窕丹青戶牖空落
落盤踞雖得地冥冥孤高多烈風扶持自是神明力
正直元因造化功大厦如傾要梁棟萬牛回首丘山
重不露文章世已驚未辭剪伐誰能送苦心豈免容
蟻蟻香葉終經宿鸞鳳志士幽人莫怨嗟古來材大
難為用段文昌題曰是草木有異于草木則靈武侯
祠前栢壽千齡盤根擁門勢如龍形含碧太空散霧
虛庭合抱在於旁枝駢梢葉之青青百尋及於半身
蓄風雷之冥冥攢柯垂陰分翠間明忽如虬螭向空
爭行上承翔雲孤鸞時鳴下蔭芳苔凡草不生古色
天風蒼蒼玲玲曾到靈山老栢縱橫亦有大者良之
與京於惟武侯佐蜀有程神其不昏表此為栢所廟
斯栢實播芳馨長慶二年六月也李義山詩蜀相階
前栢龍蛇捧闕宮陰成外江畔老向惠陵東大樹思
馮異甘棠憶召公葉凋湘鷺雨枝折海鵬風玉壘經
綸遠金刀曆數終誰將出師表一為問昭融陸龜蒙
詩密葉四時同一色高枝千歲對孤峯此中疑有精
靈在為見盤根似卧龍

儒林公議云武侯廟前栢圍數丈唐相段文昌有詩
石在焉唐末漸枯悴歷王孟二偽國不復生然亦不

敢伐之宋乾德五年辛卯夏五月枯柯再榮時人異
焉三國迄今千二百餘年矣新枝聳雲枯幹並存天
矯若虬龍陸游劔南藁云唐有節度使取孔明祠栢
一小枝以為手板書於圖志非誣至今則此栢亦稱
靈異著聞極矣

宋劉望之云雙流縣保國觀古栢其大連九臂乃合
較孔明廟中栢正一倍也異時震霆焚其一幹人以
為昔有伏丹其下歲久丹飛去又嘗有雙鶴棲其上
因作詩以紀之草木長生亦偶然不須聞此便談仙
燒枝競說丹飛日舉世寧知手種年雙鶴不歸秋自

冷萬牛回首句空傳相逢 飲清陰下與子前
有緣胡宗師題雙流保國觀古栢云孔明廟前古栢
竒此木氣象尤過之幹東髣髴煙焰起鐵龍空駕
一枝真人丹成何所適世傳乘鶴冲天飛求詩
心彌堅試聽一誦工曹詩

唐大中時遂州薦福院僧所植栢數十圍後唐之亂
山林一空此栢賴寺僧以二縑逭其害賦咏甚多紹
聖丙子李常為令作詩曰當日雙縑值萬緡買留柯
葉拂星辰上巢絕頂繞千鶴下憇清陰可百人見輿
地紀勝

梓潼志七曲山有應夢臺臺側有栢晉時植龍首虬
枝霜皮老榦見者即知為千年物嘉州志凌雲山清
音亭前有栢四株霜皮黛色其葉一則瑣細如翦一
則扁仄如片一則垂絲如柳一則蜩刺如毛異于常
栢也劔門志縣八十里停舡山有冲窅觀唐李真人
於此煉丹仙去手植栢十八株或云以識唐十八帝
有石刻乃宋乾德僧懷義撰

蜀都賦楔樅注云楔如松有刺樅栢葉松身

方物略竹栢生峨眉山中葉繁長而籜似竹然其幹
大抵類栢而亭直贊曰葉與竹類緻理如栢以狀得

名亭亭脩直

蜀地宜栢而宜松即見有一二種亦新栽耳少陵
覓松樹子詩落落出羣非檉柳青青不朽豈楊梅欲
存老蓋千年意為覓霜根數寸栽又詩云四松初移
時大抵三尺強別來忽三載離立如人長會看根不
拔莫計枝凋傷幽色幸秀發踈柯亦昂藏所插小藩
籬本亦有隄防終然振撥損得愧千葉黃敢為故林
主黎庶猶未康避賊今始歸春草滿空堂覽物歎衰
謝及茲慰淒涼清風為我起洒面若微霜足以送老
姿聊待偃蓋張我生無根蒂配爾亦茫茫有情且賦

詩事迹兩可忘勿矜千載後慘澹蟠穹蒼又詠嚴鄭
公堦下新松詩弱質豈自負移根方爾瞻細聲聞玉
帳疎翠近珠簾未見紫煙集虛象清露霑何當一百
丈歎蓋擁高簷大抵蜀地松不能以敵栢也

蜀亦不宜于柳太白西巡歌云柳色未饒秦地綠可
見矣然予觀三齊略記曰劉悛為益州刺史獻蜀柳
數株柔條甚長狀若絲縷武帝值於太昌靈和殿前
常翫嗟之曰楊柳風流可愛似張緒梁元帝折楊柳
詩曰巫山巫峽長垂柳復垂楊同心宜同折故人懷
故鄉李商隱巴江柳詩巴江可惜柳柳色綠侵江其

見于歎賞又如此

方物略云楠蜀地最宜者生童童若幢蓋然枝葉不
相礙茂葉美蔭人多植之樹甚端偉葉經歲不凋至
春陳新相換有花實似母丁香贊曰在土所宜亭權
而上枝枝相避葉葉相讓繁陰可庇美翰斯仰蜀都
賦曰榎楠幽藹又曰交讓所植注交讓木名兩樹對
生一樹枯則一樹榮如是歲更終不俱生不俱枯也
出岷山安都縣任昉述異記黃金山有柎木一年東
榮西枯一年西榮東枯張華以為交讓木宋祁曰即
柎也其木直上柯葉不相妨陸慧曉亦謂柎是交讓

蜀中名物 卷之三
顏師古曰枏與楠同

古今集記犀浦鎮有遽仙觀為遽真人舊隱也有四大楠甚古陸放翁云予在成都嘗以事至沉犀過國寧觀有古楠四皆千歲木也枝擾雲漢聲挾風雨根入地不知幾百尺而陰之所庇車且百兩正晝日不穿漏夏五六月暑氣不至凜如九秋成都固多壽木然莫與四楠比予蓋愛而不能去者彌日有石刻立廡下曰是仙人遽君手植也○文類繁江隆道觀玉帝殿庭有古楠二章分列左右如輔弼然元祐八年一夕風雷大作偃其左偏者邑宰命匠石取之方執柯伐其枝忽聞軋軋聲楠乃稍稍起立匠石攀其上如猿猱然觀者驚駭邑宰降階伏而謝罪繁尉蒲咸臨記之甚詳

杜少陵卜居草堂一楠甚古其作詩云枏樹色冥冥江邊一蓋青近根開藥圃接葉製茅亭落景陰猶合微風韻可聽尋常絕醉困卧此片時醒又有歎枏樹為大風所拔歌倚江枏樹草堂前故老相傳二百年誅茅卜居總為此五月髣髴聞寒蟬東南飄風動地至江翻石走流雲氣幹排雷雨猶力爭根斷泉源豈天意滄波老樹性所愛浦上童童一青蓋野客頻留

懼雪霜行人不過聽竽籟虎倒龍顛委榛棘淚痕血
點垂胷臆我有新詩何處吟草堂自此無顏色

嚴武題巴州光福寺楠木詩楚江長流對楚寺楠木
幽生赤崖背臨溪插石蟠老根苔色青蒼山雨痕高
枝開葉鳥不度半掩白雲朝與暮香殿蕭條轉密陰
花龕滴瀝垂清露聞道偏多越水頭烟生霽歛使人
愁月明忽憶湘川夜猿叫還思鄂渚秋看君幽藹幾
千丈寂莫窮山今遇賞亦知鐘梵報黃昏猶臥禪林
戀竒響史俊和詩云近郭城南山寺深亭亭竒樹出
禪林結根幽壑不知歲聳幹摩天凡幾尋翠色晚將

嵐氣合月明時有夜猿吟經行綠葉望成蓋宴坐黃
花長滿襟此木常聞生豫章今朝獨秀在巴鄉凌霜
不肯讓松柏作宇由來稱棟梁會待良工時一盼應
歸法水作慈航按李鷹時為巴州刺史俊其客也
蔣堂清陰館種楠詩手植檜楠二千樹時當慶曆五
年春還期莫道空歸去留得清陰與後人堂成都太
守種楠以二千計亦可謂好事矣

異物志楠木年深向陽者凝結花紋俗呼為鬪栢楠
亦有蟠結如山峯者蘇老泉所作木假山即此物也
梅聖俞詩空山枯楠大蔽牛霹靂夜落魚鳧洲魚鳧

水射幾千秋蠹肌爛隨沙蕩流惟存堅骨蛟龍鏤形
侔三峯中雄酋左右兩峯相挾翼尊奉君長無慢尤
蘇夫子見之驚且喜買於谿叟憑貂裘因嗟大不為
棟梁又歎殘不為薪樵雨漫蘚濕得石瘦直與夫子
歸隱丘東坡曰先君子嘗蓄木山三峯且為之記詩
人梅二丈聖俞見而賦之今三十年矣而猶子千乘
又得五峯益竒因次聖俞韻使併刻于其側詩曰木
生不願回萬牛願終天年仆沙洲時來幸逢河伯秋
掀髯見恠推木流蓬萊雪嶺巧彫鏤蟄蟲行蟻為豪
酋阿咸大膽忽持去河伯好事不汝尤城中古沼浸

坤軸一林瘦竹吾菟裘二頃良田不難買三年禮木
行可樵會將白髮對蒼巘魯人不厭東家丘樂城次
韻江槎出沒浮犀牛波濤掀天谷為洲江寒水落驚
霜秋危根瘦節鳴寒流脆朽吹去誰鏤鏤連峯疊嶂
立首首吾家此山不易得十年弃置空自尤猿號鶴
唳豈無意委蛇怪我懷羔裘西歸父老拍手笑笑憶
翁子躬薪樵去時三山今有五不問故園惟一丘
蜀都賦祀櫛椅桐註引雅詩其桐其椅也劉敬叔異
苑云晉武帝時吳郡臨平岸崩出一石鼓打之無聲
以問張華華云可取蜀中桐材刻作魚形打之則鳴

蜀中桐花開最早也
於是如言音聞數十里華陽國志益州有梧桐木其
華采如絲人績以為布名曰桐華布白傅桐花詩春
令有常候清明桐始發何此巴峽中桐花開十月豈
伊物理變信是土宜別地氣反寒暄天時倒生殺草
木堅強物所稟固難奪風候一參差榮枯遂乖刺况
吾北人性不耐南方熱強羸壽夭間安得依時節以

山海經單狐之山多机木郭注机似榆可燒以糞稻
田出蜀中丹鉛錄以為即今之檜總志云檜古稱蜀
木成都為盛也酉陽雜俎蜀中有木類柞衆木榮時

枯枿隆冬方萌芽布陰蜀呼為楷木方物略云檜木
民家時之不三年材可倍常薪疾種亟取人以為利
贊曰厥植易安數歲輒林民賴其用實代其薪不棟
不梁亦被斧斤少陵憑何十一少府邕覓檜木數百
栽詩草堂塹西無樹林非子誰復見幽心飽聞檜木
三年大與致谿邊十畝陰自注云蜀人以檜木為薪
三年可燒也予過草堂見檜木陰陰隔岸臨水猶可
想見少陵往來行迹問他樹則不能語云嚮其利者
為有德矣

川中桑柘亦稀有惟西北飼蠶蓄之諸葛武侯表云

臣家成都有桑八百株子弟衣食供給無患李膺益
州記云臨津縣掌天山多柘堪為弓雖縻絲燕角不
能勝也碑目云名山縣土主神姓花乃丹稜花敬定
之弟俗呼三郎廟廟有樹一榦桑一榦柘所謂壬子
癸丑桑柘木也

白蠟樹似冬青而近水蜀人買蠟虫他處以清明時
用桐葉包裹掛於枝上至孟秋則樹枝皆如綿刮而
熬之成蠟東南州縣多有之

白樂天庭槐詩在忠州作南方饒竹樹唯有青槐稀
十種七八死縱活亦支離何此郡庭下一株獨華滋

濛濛碧煙葉嫋嫋黃花枝我家渭水上此樹蔭前驛
忽向天涯見憶在故園時人生有情感遇物牽所思
樹木猶復爾况見舊親知按通志云槐榆之植蜀土
所宜錦官城中閭巷夾道而植想樂天時未入西川
也

劔門之左峭巖間有異樹生石縫中大可數圍枝榦
純白皆傳曰白檀樹其下常有巨虺蟠而護之民不
敢採伐出玉堂閒話

韻書云黃葛木壽可千歲形如衆藤連理合而為一
大者合抱高數丈葉如椽喜緣崖生擁腫屈曲咸淳

府景德觀前有古木大數十圍枝柯盤鬱如蓋山中
人云此黃葛樹千年物也寰宇記羅目縣東南三十
里陽山江溉兩樹對植圍三尺二寸上引橫枝亘二
丈相援連理陰庇百夫其名黃葛即嘉樹也蘇子由
詩予生雖江陽未省至嘉樹指此

方物略云娑羅花生我眉山中類枇杷數葩合房春
開葉在表花在中根不可移故人不得為玩贊曰聚
葩共房葉附華外根不得徙見偉茲世范石湖我眉
行記娑羅樹葉如楊梅又似海桐花有紅白二色春
夏間開惟大我山有此今名其處為娑羅坪黎州圖

經通望縣西一百步內有天王堂堂前有池池南有
娑羅綿樹三四人連手合抱方匝其花盛夏方開先
花而後葉謝時不背而墮宛轉至地花藥有綿謂之
娑羅綿古老相傳云是肉齒和尚住持靈跡縣界有
和尚山云雅安志娑羅花有五色如爛錦照映山谷
出瓦屋山中大抵娑羅非名山佛地不能得也

杜甫蜀中丁香詩丁香體柔弱亂結枝猶墊細葉帶
浮毛踈花披素豔深栽小齋後庶近幽人占晚壓蘭
麝中休懷粉身念麗春詩百草競春華麗春應最勝
少須好顏色多漫枝條剝紛紛桃李枝處處摠能移

如何貴此重却怕有人知少陵在蜀又一草一木皆入詠可謂集衆芳者矣

方物略月季花即東方所謂四季花翠蔓紅藹者蜀少霜雪此花得終歲十二月輒一開贊曰花亘四時月一披秀寒暑不改似固常守

又云錦帶花蜀山處處有之長蔓柔纖花葉間側如藻帶然因象作名花開形似飛鳥里人亦號鬢邊嬌贊曰冉冉其條若不自持綠葉丹英蔓衍紛垂范石湖詩妍紅棠棣粧弱綠薔薇枝北風一再來飄飄隨舞衣吳下嫵芳檻峽中滿荒陂佳人墮空谷皎皎白

駒詩蓋東南以錦帶為珍峽中蔓生山谷故云

方物略錦被堆花出彭州其色一似薔薇有刺不可玩故俗謂薔薇為錦被堆贊曰花跗芬侈叢刺于梗不可把玩艷以妍整唐裴說詩一架長條萬朵春嫩紅深綠小窠勻只因根下千年土曾葬西川織錦人張祐詩曉風林盡燕支顙夜雨催成蜀錦機當晝開時正明媚故鄉疑是買臣歸范成大詩誰把柔條夾砌栽壓枝萬朵一時開為君也着詩收拾題作西樓錦被堆

成都古今記荼蘼花香甚可以為酒晉山濤為郗令

以此花釀酒竹中所謂郫筒酒也方物略云蜀茶蘼
多白而黃者時時有之但香減于白花贊曰人情尚
奇賤白貴黃厥英略同實寡于香宋臨邛盧申之茶
蘼詞云蕩紅流水無聲暮煙細草黏天遠低回倦蝶
往來忙燕芳期頓懶綠霧迷墻翠虬騰架雪明香暖
笑依依欲挽春風教住還疑是相逢晚不似梅妝瘦
減占人間半神蕭散攀條弄蕊天涯猶記曲闌小院
老去情懷酒邊風味有時重見對枕幃空想東牀舊
夢帶將離怨右調水龍吟

蜀中茉莉有枝如藤而花瓣稍大盧申之詞云玉肌

翠袖較似荼蘼瘦幾度熏醒夜窻酒問炎州何許清
涼塵不到水壺剪就晚來庭戶悄暗數流光細拾芳
英黯回首念日暮江東偏為魂銷人易老幽韻清標
似舊正簾紋如水帳如烟更奈問月明露濃時候右
調洞仙歌

杜甫詩梔子比衆木人間誠未多於身色有用與道
氣傷和紅取風霜實青看雨露柯無情移得汝貴在
映江波野人間話云蜀主昇平中嘗理花卉有青城
中叟進花子兩顆奏云知理苑圃輒進名花以助佳
趣詔賜之束帛出至市散帛與貧人遂不知去處已

宣令內園子種之二年枝葉婆娑則梔子樹也其花
爛紅六出香襲人蜀主甚愛之或令圖入團扇或綉
入衣服或以熟帛絹素鵝毛製作首飾謂之紅梔花
及結實則顆大於常梔用以染素則成赭紅色甚妍
翠于時珍之蜀檮杌廣政十二年十月召百官宴芳
林園賞紅梔花此花青城山中進子三粒種成者六
出而紅清香如梅當時最重也

檮杌云孟昶廣政十二年令羅城上植芙蓉盡以幄
幙遮護九月盛開望之如錦繡謂左右曰自古以蜀
為錦城今日觀之真錦城也當時張玄作詩曰四十

里城花發時錦囊高下照坤維雖粧蜀國三秋色難
入幽風七月詩去年今日到成都城上芙蓉錦繡舒
今日重來舊游處此花憔悴不如初預歎其不永矣

文與可二色芙蓉詩蜀國芙蓉名二色重陽前後始
盈枝畫調粉筆分粧處繡引紅針間刺時落晚自怜
窺露沼忍寒誰念倚霜籬主人日有西園客得爾方
於歡酒宜蓋此花初開色白已變而紅俗號之醉芙
蓉也或曰即木蓮花方物略木蓮花生峨眉山谷狀
如芙蓉香亦類之木榦花夏開枝條茂蔚不為園圃
所蔕賡曰葩秀木顛狀若芙蓉不實而榮馥馥敷其

酉陽雜俎木蓮葉似辛夷花類蓮花色相傍出忠州
鳴玉溪邛州亦有白樂天云木蓮樹生巴峽山谷間
巴民亦呼為黃心樹大者高五丈涉冬不凋身如青
楊有白文葉如桂厚大無脊花如蓮香色艷膩皆同
蜀房蕊有異四月初始開自開迨謝僅二十日生忠
州西北十里鳴玉谿者尤穠茂惜其遐僻因題三絕
句如折芙蓉栽旱地似拋芍藥桂高枝雲埋水隔無
人識唯有南賓太守知紅似臙脂膩如粉傷心好物
不須臾山中風起無時節明日重來得在無已愁花
落荒巖底復恨根生亂石間幾度欲移移不得天教

拋擲在深山白傅又畫木蓮花圖寄元郎中詩花房
膩似紅蓮朶艷色鮮如紫牡丹唯有詩人解親愛丹
青寫出與君看老學菴云白樂天有忠州木蓮詩予
遊臨邛白鶴山寺佛殿前有兩株其高數丈葉堅厚
如桂以中夏發花狀如芙蓉香亦酷似寺僧云花坼
時有聲如破竹然一郡止此二株不知何自至也
成都古今記蕭紀僭號之歲寢殿栢柱上繞節生花
如蓮其莖四十有六霍靡可愛識者以為王敦之杖
花明年紀敗年亦四十六云

揚雄蜀都賦樹以木蘭左思蜀都賦木蘭棖桂按木

蘭大樹也葉似長生冬夏榮常以冬華其實如小柿
甘美南人以為梅其皮可食寰宇記崇慶州產木蘭
皮簡池志有木蘭寺以多此物也

蜀都賦注檎桂木桂也談資云蜀桂之丹者色亦甲
于南中

白樂天喜山石榴花開作詩云忠州州裏今日花廬
山山頭去年樹已憐根損新新栽還喜花開依舊數
赤玉何人少琴軫紅纈誰家合羅袴但知爛熳恣情
開莫怕南賓桃李妬樂天又有戲問山石榴詩小樹
山榴近砌栽半含紅萼帶花來爭知司馬夫人妬移

到庭前便不開又以山石榴寄元九詩山石榴一名
山躑躅一名杜鵑花杜鵑啼時花撲撲九江三月杜
鵑來一聲催得一枝開江城上佐閒無事山下斲得
廳前栽爛熳一欄十八樹根株有數花無數千房萬
葉一時新嫩紫殷紅鮮麴塵深痕裊損臙脂臉剪刀
裁破紅綃巾謫仙初墮愁在世姹女新嫁嬌泥春日
射血珠將滴地風翻火焰欲燒人間折兩枝持在手
細看不似人間有花中此物似西施芙蓉芍藥比嫫
母奇芳絕艷別者誰通州遷客元拾遺拾遺初貶江
陵去去時正值春山暮商山秦嶺愁殺人山石榴花

紅夾路題詩報我何所云苦云色似石榴裙當時叢
畔惟思我今日欄前只憶君憶君不見坐銷落日西
風起花紛紛

酉陽雜俎山茶似海石榴蜀地有之談資云山茶有
雲南紅石榴紅謝萬定數種朶大勝芍藥重瓣如芙
蓉土人自能接他處莫匹也寶珠雖有尚拜其下風
仁壽志謝萬定者木匠也自雲南大理府負山茶一
種歸因以人名花宋王覲集大慈聞海雲山茶合江
梅花開遂邀同賞作詩野寺山茶昨夜開江亭初報
一枝梅旋邀座上逍遙客同醉花前漱澗盃秀色霜

濃方潤澤暗香風靜更徘徊仙姿莫遣常情妬不帶
東山伎女來胡宗師和云錦水黃金密印開東南時
望滯鹽梅得隨劔外同為客幸逐花前醉倒盃白玉
藥高枝瘦碧臙脂萼嫩葉低徊綺羅不識清詩骨須
趁春風摸石來劉缺和云百卉嚴寒未放開山茶映
發蜀江梅解顏况有花經眼取醉寧辭酒滿盃照日
亂紅光爛熳漾流輕素影徘徊樽前已得春消息不
待江南驛使來徐彥孚和云萬藥山茶傍臘開一番
春信入江梅追游共按黃金轡縱賞還傾白玉盃濃
艷迎風香斷續踈枝橫月影徘徊隼旒不負登臨興

更約携朋載酒來吳師孟和云何處珍叢最早開海
雲山茗合江梅忽傳詩帥邀膚使不用歌姬侍宴盃
曉艷鮮明供綺靡晚粧清淡奉徘徊此時文酒風流
事豈似臨江放蕩來宋蒲瀛次袁升之遊海雲寺鴻
慶院賞山茶之什六首山茶兩本上連空壘葉棲枝
占佛宮雀尾有金輪紺碧鶴頭無火讓殷紅優於峽
茗稱呼異劣與梅花氣候同誰識諸天雨花外道人
宴坐雪霜中其二年花葉炫虛空歲月循環十二
宮對植霜天無賴碧特開金地可憐紅長春比並何
妨別密雪交加有底同不必傳神呼趙老君詩元在

典刑中其三花開似火半燒空熒惑飛來失故宮但
見洛人誇魏紫誰知蜀國產真紅肯隨月季無時節
應惟梅花有異同遠挈一罇誰伴我還從山裏望城
中其四對境那能問色空山茶花發映蓮宮攻餘瑟
瑟風搖綠刑盡猩猩日曬紅大雪迷漫元斗異千林
搖落不雷同何須誑汝老迦葉分付闍黎一笑中其
五臘月寒冰火滿空玄冥移種祝融宮雪霜底事論
堅白兒女何知愛軟紅金鼎轉丹應有異玉沙洗水
若為同細思造物元無物顛倒繁華掌握中其六花
發今年喜不空遨頭肅客上蕭宮雪殘千丈猶連白

風引雙旌欲闢紅他日勲名三事在先春和氣萬家
同等閑草木蒙前被况入尋常顧盼中范石湖十二
月十日賞海雲山茶詩門巷驩呼十里村臘前風物
已如春多年池上經行處萬里天邊未去人客鬢花
身俱歲晚妝光酒色且時新海雲橋下溪如鏡休把
冠巾照路塵

蜀都賦攄桃函列爾雅曰攄山桃也劉禹錫竹枝詞
山桃花紅花滿上頭蜀江春水拍山流花紅易衰似郎
意水流無限似儂愁少陵於蕭八明府寔處覓桃栽
詩奉之桃栽一百根春前為送浣花村河陽縣裏雖

無數濯錦江邊未滿園白傅種桃杏詩大抵心安即
是家年深兼欲忘京華忠州且作三年計種杏栽桃
擬待花又寄題忠州小樓桃花詩再遊巫峽知何日
揔是秦人說向誰長憶小樓風月夜紅欄干外兩三
枝予于錦官署中得一種桃花白而重臺者微露紅
色若繪事然此海內所無也

放翁云歐陽公梅宛陵王文恭集皆有小桃詩歐詩
雪裏花開人未知摘來相顧共驚疑便當索酒花前
醉初見今年第一枝初但謂桃花有一種早開者耳
及遊成都始識所謂小桃者上元前後即着花狀如

垂絲海棠曾子固雜識云正月二十開天章閣賞小桃正謂此也

蜀都賦云朱櫻春熟杜甫野人送櫻桃詩西蜀櫻桃也自紅野人相贈滿筠籠數回細寫愁仍破萬顆勻圓訝許同憶昨賜霑門下省退朝擎出大明宮金盤玉筋無消息此日常新任轉蓬白樂天題東樓前李使君所種櫻桃詩身入青雲無見日手栽紅樹又逢春唯留花向樓前看故故拋愁與後人宋何耕曰余承乏成都郡丞官居舫齋之東有櫻樹焉本大實小其熟猥多鮮紅可愛而苦不可食雖烏雀亦弃之感

而賦之云始余至於官居眄茲樹之特竒幹擁腫以上達條扶踈而下披蔭露井其有餘知封植之幾時或告予以含桃出饒涎而流頤意薦廟之珍果必甘滋之若飴幸一熟之得嘗指麥秋以為期忽春事之已晚訝子結之獨遲初瑣碎以破蕾漸毓稠而着枝聊攀摘以適口乃苦澁而顰眉類置膽於越國異茹齋於周詩謝芳液之津津空殷紅之纍纍誤來集之衆鳥誑無知之羣兒感人事之大謬為累歎而齋谷或名美而實乖或表盛而裏虧或色厲而內荏或迹公而情私鷲翰假於鳳鳴羊質混於虎皮佞似聖以

疇測姦託儒而莫窺莽恭儉以竊國卯博辯以僵尸
談仁義其可樂視所履而舛馳儼衣冠於民上為賈
豎之不為方滔滔以皆是奚一木之足悲

本草醋林子生邛州山箐中木高丈餘枝葉繁茂三
月開白花九月十月子熟纍纍數十枝成朶生青熟
赤略類櫻桃而蒂短熟時采之陰乾連核用上人以
鹽醋收藏充果食

杜少陵詣徐卿覓果子栽詩草堂少花今欲栽不問
綠李與黃梅石笋街中却歸去果園坊裏為求來白
樂天嘉慶李詩東都綠李萬州栽君手封題我手開

把得欲嘗先悵望與渠同別故鄉來蜀都賦云荅選
離支張揖曰荅選似李出蜀也

蜀都賦有扶柈檣註林檎實似赤柈而小味如梨梁
庾肩吾謝賚林檎啓曰丹徒故苑歲綿長而不見栽
山雖植路重阻而來難未有徙核圓丘移根閬坂仙
廚始摘猶青王之盤下賤爰頒遂八柚之座

洞冥記云蜀都素柈以夏成梁褚澣柈詩曰成都貴
素質酒泉稱白麗紅紫奪夏藻芬芳掩春蕙映日照
新芳叢林抽晚蒂誰謂種三珠終焉競八桂不讓圓
丘中染潔華庭際

宋祁方物略北方葡萄熟則色紫蜀有綠葡萄熟時
其色正綠贊曰西南所宜不蔓紛衍縹穗綠實其甘
可薦

蜀都賦云紫梨津潤洞冥記曰塗山之背梨大如升
色紫千年一花亦曰紫輕梨矣梁沈約應詔詠曰大
谷來既重岷山道有難摧折非所吝但令人王盤劉
孝綽應令詠曰玉壘稱津潤金谷詠芳菲詎匹龍樓
下素葉映華扉後梁宣帝詩曰大谷常流稱南荒本
足珍綠葉已承露紫實復含津齊謝朓謝隋王賜梨
啓曰味出靈關之陰旨介玉津之澁豈徒真定歸羨

大谷慚滋已上四作皆本左思紫梨津潤之一言也
隼山岷山玉壘靈關玉津皆蜀地

普慈志縣介萬山間無土地肥饒之產舟車貨利之
聚惟鐵山棗崇龕梨天池藕三者皆陳希夷所種遂
寧志宋初遂州栢子鎮龐君厚者與陳希夷善一日
訪之華山希夷餉以梨龐乞一種歸植之因蕃衍得
名方輿云廣安軍梨有數種入口即化者為上世謂
廣安有十似梨似耿其一也范蜀公詩白巖霜重紅
梨曉注曰白巖梨比鳳栖差小而其味過之陸游入
蜀記云巫山縣大溪口出美梨大如升

張世南游宦紀聞榘棹大者如梨味甜而香用刀切則味損而黑凡食時先以巾拭去毛以巾包於柱上擊碎其味甚佳蜀中有之

韻寶云檄芳無切檄檻木名生蜀山中子有鹽如霜

滇中名鹽霜果○方物略天仙果樹高八九尺無花

葉似荔枝而小子如櫻桃纍纍綴枝間六七月熟味

至甘贊曰有子孫枝不蘊而實薄言采之味埒蜂蜜

丹鉛錄優曇鉢花似枇杷無花而實即蜀中無花果

也

蜀都賦林檎枇杷注枇杷冬花黃實本出蜀中王建

贈薛濤詩萬里橋邊女校書枇杷樹裏閉門居掃石

才子知多少管領春風揔不如白傅山枇杷花詩萬

重青嶂蜀門口一樹紅花山頂頭春盡憶家歸未得

低紅如解替君愁文彥博枇杷詩有果產西裔作花

凌早寒樹繁碧玉葉柯疊黃金丸上都不可寄咀味

獨長嘆然蜀中枇杷不能佳若比閩中猶太白之于

月耳

蜀都賦有檄栗罇發藝文類聚梁州獻栗徑寸半方

物略天師栗生青城山中他處無有也似栗味美惟

獨房為異久食已風孳贊曰栗類尤衆此特殊味專

蓬若椽託神以貴青城志上清宮在丈人祠之側晉
朝立宮于上夜則神燈遍空其東北麓有天師手植
栗十七株文同詩天師携此種至自上饒遠當時十
七樹高幹倚孤巘蒼蓬蒺藜大紫殼檳榔軟蜀部名
果中推之為上選

綿州神泉縣出榛子亦能改坐所云八子之數

方物略云餘甘子生戎瀘山中樹大葉細似槐實若
李而小咀之前苦後酸酸有味故號為餘甘枝有稜
或六或七解硫黃毒即本草所謂蒼摩勒也贊曰黃
葩翠葉圓實而澤咀久還甘或號蒼勒癸辛雜志云

涪翁在戎州日過蔡次律家小軒外植餘甘子乞名
於翁因名之曰味諫軒其後王子予以橄欖送翁翁
賦云方懷味諫軒中果忽見金盤橄欖來想見餘甘
有瓜葛苦中真味晚方回然則二物亦可名之為諫
果也山谷與人書云餘甘乃有一種大者如李其質
味甘脆與常見者絕不類或云蠻中有之西域傳云
餘甘二種大者生青熟黃小者始終青色蓋信然矣

華陽國志犍為南安縣有柑橘官社廣志曰甘有二
十一種成都平滯甘大如升色蒼黃酉陽雜俎天寶
十載上謂宰臣曰近日於宮內種柑子數株今秋結

實百五十顆與江南蜀道所進不異大唐新詔益州
每歲進柑子皆以紙裹之他時長吏嫌紙不敬代以
細布既而恐柑子為布所損每懷憂懼俄有御史甘
子布使於蜀驛使馳白長吏有御史甘子布至長吏
以為推布裹柑子事懼口果為所推及子布到驛長
吏但序以布裹柑子為敬子布初不之知久而方悟
聞者莫不大笑方物略柑生果渠嘉等州結實埒于
江南味亦差薄贊曰碧葉素葩厥包之珍丹衷既披
香液飴津

晉張載詩三巴黃甘瓜州素柰渴者所思銘之裳帶

唐杜甫詩春日清江岼千柑二頃園青雲著葉密白
雪避衣繁結子隨邊使開筒近至尊後於桃李熟終
得獻金門薛濤酬郭簡州寄柑子詩霜規不讓黃金
色圓質仍含御史香何處同聲情最異臨川太守謝
家郎宋夔守王十朋謝趙果州元旦遺黃柑金泉酒
詩曰元日書來自果州柑三百顆酒新篋賢於齊下
六從事好似平陽千戶侯老矣惟思醉鄉去歸與且
種木奴休使君厚意吾先辱媿乏瓊瑤報所投

史記蜀漢江陵千樹橘其人與千戶侯等蜀都賦戶
有橘柚之園注大曰柚小曰橘犍為南安縣出地理

蜀中物志 卷之三
記曰蜀郡嚴道巴東郡胸臆魚復二縣出橘有橘官
傅巽七誨有巫山朱橘周李元操園中雜詠橘詩曰
嘉樹出巫陰分根徙上林白華如霰雪朱實似懸金
布影臨丹地飛香度玉岑自有凌冬質能守歲寒心
文選盧橘夏熟郭璞註曰今蜀中有給客橙似橘而
非若袖而芬香冬夏華實相繼或如彈丸或如拳通
歲食之即盧橘也

蜀中方物記卷之三終

